

蒲

DS
793
S32 P827
1735
V2



册	2
卷	2-4

蒲州府志卷之二

山川

雷首山名始見於禹貢水經注雷首山臨大河北去蒲阪三十里尚書所謂壺口雷首者尚書正義云雷首在蒲阪縣南史記索隱在蒲阪縣東南括地志云蒲州河東雷首山一名中條亦名歷山亦名首陽山亦名薄山亦名襄山亦名甘棗山亦名渠潴山亦名獨頭山亦名吳山西起雷首東至吳坂凡十二名隨州縣分之唐地理志永樂縣有雷首

山元和郡縣志雷首一名中條在河東縣南十五里永樂縣北三十里杜氏通典云雷首在今河東縣此山凡有八名歷山首陽薄山襄山甘棗中條渠豬獨頭也寰宇記云凡九名

首陽山名始見於詩論語舊志在蒲州南四十五里今以地考之則在永濟縣南少東五十里矣

山西通志

作三十里且云一名方山尤誤

詩傳云首陽在蒲阪南馬季長云

首陽在蒲阪華岳之北河曲之中闕駟十三州記

曰首陽一名獨頭山夷齊所隱也水經注云山南

有古塚松柏蔚然攢茂丘阜俗謂之夷齊墓其水
西流亦曰雷水晉書地志雷首山伯夷叔齊隱其
陽所謂首陽山杜氏通典因其說通考承之樂史
寰宇記云首陽即雷首之南阜今有夷齊廟存自
元世至今稱二賢祠

兩漢史及晉魏志多言首山雷首不及中條中
條之名蓋起後世若水經注雷首山臨大河北
去蒲坂三十里俗亦謂之堯山上有堯城堯昔
都此是雷首又有堯山之名然考班固地理志

蒲阪有堯山雷首山在南則雷首與堯明分二
山似亦未得卽以堯山爲雷首也元和志云雷
首一名中條在河東縣南十五里永樂縣北三
十里則似卽以今郡城南倚郭諸山擬雷首以
地之遠近較之與酈元所記殊矣自黃帝採首
山銅班固地志蒲阪有首山祠漢元封六年作
首山宮應劭以爲在上郡而文潁言蒲阪顏監
獨取潁是後言地理者以首陽爲卽首山之陽
於論爲近又晉志水經注並以雷首卽首陽而

明代都穆則分首陽雷首爲二古論語注又云
俗以區陽山爲首陽蓋嘗論之古所稱薄山襄
山甘棗渠豬者今已久不復知莫得指何者爲
某某唯雷首首陽則在縣域明可得見大抵雷
首首陽總爲一山或稱雷首或稱首山或稱首
陽古人臨文稱名亦因其一時而不必有所定
則今在縣南五十里昔所謂河曲之中與潼關
對峙其峰在南別出者爲首陽而本位面正者
則雷首古以山南爲陽首陽之名或取諸此夫

禹貢所導山川並記其大雷首大矣故與壺口並舉之括地志所云於理爲得明時論者謬指形勢乃以雷首首陽皆中條之餘支是知有中條而不知雷首矣若夫述征記言華岳首陽本同一山巨靈擘之以通河流至今存掌跡焉則荒忽之說雖自漢世已有之見於揚雄之賦置不論可也

路史首陽辨云首山之名所在不一曹大家云在隴西今隴西有地曰首陽東有鳥鼠山謂之

首陽許叔重言首陽在遼西以孤竹封地當之
然今遼州和順縣東有山曰首陽並有祠廟又
吳郡亦有首山乃漢高誘則謂洛陽東北二十
里之首陽山爲夷齊餓處杜預阮籍咸以爲然
宋黃太史夷齊祠記以或者武王渡孟津二子
叩馬而諫當以洛陽爲是唯馬融顏師古所說
並以夷齊塚廟在河東之蒲阪首陽山之南按
夷齊之蹤當在河東隴西洛陽非其實耳首山
者雷首也是爲中條卽蒼山也

歷山在永濟縣東南六十里上有舜廟後周宇文護
爲總管時所造水經注郡南有歷山謂之歷觀舜
耕處有舜井媯汭二水出焉揚雄河東賦云登歷
觀而遙望兮聊浮游以經營樂往昔之遺風兮嘉
虞氏之所耕

路史歷山辨樂史寰宇記言歷山在偃師西北
二十五里有舜廟舜井媯水汭水上谷記云下
洛城西南四十里有潘城城西北三里亦有歷
山下有舜瞽二祠齊之歷城南二里又有歷山

水經注其上有舜祠縣東有舜井亦是耕處九
域志濟南濮陽河中皆有歷山俱存祠廟子列
子云舜耕河陽尚書太傳舜陶河濱元和志指
爲河東縣北四十里之陶城蘇氏演義云歷山
有四一河中二齊之歷城縣三冀州四濮之雷
澤雷澤不聞有二耕漁必不相遠卽此爲是今
曹濮間有舜豢龍井定陶城皆其踪也然歷山
何止四哉信都之歷山樂史亦以爲舜耕在是
而周處記始寧復有舜所耕田且以姚嬀之名

在在而是金之西城有姚方媯墟杜佑謂舜生
此世本亦云媯墟舜所都在西城今長沙縣有
媯水云舜所都而上虞之損石號爲公嶄會稽
又有媯水祝阿故縣又有灤水有娥英之廟山
上有舜祠下開大穴謂之舜井兗之四源又有
陶墟舜井山下澤方十五里指爲舜之所漁若
陽城漢獲澤縣墨子則言舜漁在此郡國志言
今邑西有地名舜田又潭之益陽岳之沅江梁
之重華並有虞帝城亦以謂是舜所都豈足盡

信耶

曾鞏齊州二堂記云史記舜耕歷山漁雷澤陶
河濱作什器於壽邱就時於負夏鄭康成釋歷
山在河東雷澤在濟陰負夏衛地皇甫謐釋壽
邱在魯東門北河濱濟陰定陶西南陶邱亭是
也以予考之耕稼陶漁皆舜之初宜同時事則
其地不宜相遠二家所釋雷澤河濱壽邱負夏
皆在魯衛之間地相望則歷山不宜獨在河東
也自帝堯妻之二女乃居媯汭其耕歷山蓋不

同時而地亦當異世之好事者乃因媯水出於
雷首遷就附益謂歷山爲雷首之別號不考其
實矣由是言之則圖記皆謂齊之南山爲歷山
舜所耕處故其城名歷城爲信然也

中條山在永濟縣東南十五里山有桃花玄女二洞
及谷口蒼龍諸泉有萬固棲巖二寺以其中狹而
延袤不絕故名禹貢錐指云中條在蒲州東南十
五里西起雷首委蛇而東直接太行南跨芮城平
陸北跨臨晉解州安邑夏縣諸境凡數百里有數

峰攢立拱對蒲城城中望之秀黛相照其峰中高
傍下俗名爲筆架山則其支峰蔓壑蜿蜒所及者
也

寰宇記中條山在芮城縣北十五里亦曰薄山
封禪書云薄山者襄山也薄亦爲蒲古蒲薄通
穆天子傳云東巡自河首襄山登薄山寘軫之
陞春秋傳冀爲不道入自顛軫伐鄭三門杜征
南以爲顛軫阪在河東大陽縣今平陸是則所
稱薄山宜在平陸記又云亦名陬山湯伐桀升

自隔是也然中條甚廣而隔唯一處必即其地
可以名之不得以概中條也或以山海經條谷
之山即爲中條於說徒妄大抵此山多跨州縣
故在處皆以之名若論其實則今虞鄉芮城二
縣南北橫負陰陽正乃中條餘皆其蟠旋翔薄
所際及者耳或以其南北狹薄故稱薄山是不
必然山海經記薄山之首而因有甘棗渠豬歷
兒葱蘢之名後志地理者遂舉爲雷首別名十
二之數然中山經次五歷山葱蘢復且再見山

海爲書既多不經凡所記山川方隅道里要莫爲準特其言薄山萑山首山條理既別禮祀不同山之神人與所產物恠又各殊異是不得指三者爲一而後世論者顧合薄山萑山首山以指中條或擬雷首殆亦失之勿審耳若中條雖自有其名要不外乎禹貢之所爲雷首胡渭云雷首之脈爲中條東盡於垣曲王屋在焉殆得之矣

方山在郡東南一百二十里永濟虞鄉兩縣間其半

當永樂鎮純陽宮之後地記云方山一名檀道山
即山海經檀首山也亦名百梯山水經注西則石
壁千尋東則磻溪萬仞方嶺雲迴奇峰霞舉孤標
秀出罩絡羣峰之表翠栢蔭峰清泉灌頂郭景純
云世所謂鴛漿也路出北巘勢多懸絕來去者咸
援蘿騰嶽尋葛降深於東則連木乃陟百梯方降
故亦曰百梯山也

臨晉志云方山岩嶢挿漢爲中條之首五老峰

亦俯其下唐宋金元爲永樂虞鄉兩縣勝地宋

廢永樂元廢虞鄉城郭人民繁華頓改山靈亦
久寂矣

玉簪山在永濟縣永樂鎮純陽宮側有松竹桃杏之
觀

麻谷山在永濟縣南三十里氣象盤鬱林巒蔽虧

八盤山在永濟縣南二十里八盤折而至頂歷山在

其南

九峰山在永濟縣南六十里上有道士院

鳳皇山在永濟縣南七十里與潼關對

雲蓋峰在永濟縣東三十里中條之地高切雲表

谷口在永濟縣東南十五里中條山陰是爲西麓有
蒼陵谷爲中麓其大谷口出泉處爲東麓也

曇延洞在永濟縣東南二十里棲巖寺側隋世高僧
曇延講經洞中跡傳至今

舜原永濟縣北二十里俗傳舜所生處

虞原永濟縣南三十里舊傳段干木常居此

焦嶺永濟縣東南六十里焦廬里因里得名傳漢末

焦孝然結廬於此故稱焦廬里後訛爲焦盧

書院坡在永濟縣東五里三岡隱起南岡昔建河中
書院其上中岡有文昌祠閣明楊瞻僉事所建北
岡有佛寺今稱其地爲寺坡

大嶷山

小嶷山在臨晉縣東北三十五里二山南北並列故
稱二嶷

通志云五朝志及通考桑泉有三嶷山金史亦
然唯明一統志止書大嶷小嶷臨晉志云隋志
有三嶷山今土人止稱大嶷小嶷上舊有龍祠

禱雨輒應

中條山在虞鄉縣南七里西自永濟草坪山東至解州靜林寺凡四十里皆中條之在虞鄉者

方山在虞鄉縣西南

見永濟

五老峰在方山東去虞鄉縣西南十里峭壁千尋援

鐵而上山有雷公洞上洞在歸雲巖下洞在北峰

有東西錦屏峰峰陰有張果洞又仙人韓終隱此鍊藥亦號韓峰峰東有韓君洞又有羅通微真人

洞又有青城太乙蒼龍太白諸洞洞之陽有棄瓢

巖嵩山道士李皮囊常棄酒瓢於此傍有龍井相傳唐元宗時遣玉真公主投金龍其中山麓又有金沙金龜玉女飲鹿諸泉

玉峰亦曰靈峰卽五老之南峰也雲笈七籤道書洞天福地記謂此是第五十二福地唐侯道華升仙於此

王官谷在虞鄉縣東南十里石樓峪西今名其地爲橫嶺峪北虞鄉峪南芮城矣谷爲中條勝絕處唐司空圖居其間谷內有天柱峰峰左右兩瀑飛垂

巖際人稱東瀑布西瀑布舊有司空三詔堂休休亭濯纓亭九籥室貽溪宋世兪充樂沆先後爲令皆賦詩表司空之跡爲祠堂曰表聖影堂今久廢無址有丹陽觀道士昔居之傳卽表聖故居也今觀亦荒甚無黃冠矣

百梯山

見上方山

石錐山

百徑山

隋志五朝志虞鄉有石錐山百徑山

步虛坪在五老山太乙峰南

峨嵋岡在猗氏縣北門外岡起自聞喜縣委蛇延蔓繞猗氏郭外邏臨晉之北西帶滎河至河濱止焉其猗氏縣治則岡之地脉所結也

千佛嶺在猗氏縣南八里邑志以其形勢論之爲縣之內案

鳴條岡在猗氏縣南二十里岡自安邑西南入縣境屈繞其南蓋縣治之外衛也俗傳有舜陵焉書序湯升自陲與桀戰於鳴條或言在安邑也

孤山在萬泉縣南二里高十餘里周幡八十餘里以

拔地特起不接他山因名之曰孤又名方山言山形四面皆方也山西麓有檻泉南有雙泉又有桃花洞其東谷有暖泉泉至冬不冰東谷澗上有法雲檻泉寺

介山在縣東十五里相傳介子推隱此上有子推祠漢書地理志汾陰介山在南漢武紀祀后土用事介山用事介山猶有事泰山者必先沛林矣水經注介山可高十餘里山上有神廟廟側有靈泉祈祭之日周而不耗世亦謂之子推祠揚

雄河東賦曰靈輿安步周流容與以覽於介山
嗟文公而愍推兮勤大禹於龍門晉太康記及
地道記永初記並言子推逃隱是山其實非也
予按介推所隱者綿山也文公環而封之爲介
推田號其山爲介山杜預曰在西河介休縣者
是也山西通志云詳酈氏之言當以今之孤山
爲介山其解良是道元謂廟側有靈泉而宋鄧
忠臣記孤山之東南有祠曰風伯雨師右有泉
二源在山之上下則雖數百年已遠然尚與道

元合元毛鐸風伯雨師廟記謂漢建武九年光武登臺祀此夫漢世宗世祖皆至汾陰祀后土武帝用事介山則光武亦宜爲之鐸之記得諸邑人所傳者蓋非其妄詩曰陟其高山墮山喬岳天子用事必於大山唯山高十餘里周八十餘里是宜爲望而享祀有秩若部婁之屬豈嬰玉所加若所爲風伯雨師廟者其先大要卽道元注中之子推祠歲月旣久或訛以爲風伯雨師耳夫自晉世至唐有妬女津云是子推妹能

興致風雨安知風伯雨師之廟之不類此耶若
其稱孤山者或出於一時土俗而後沿之且孤
介義一又孤介皆訓大或後人因其大山而錫
以孤名是未可知然按漢志而求介山於汾陰
捨此無與歸矣

稷王山在萬泉東三十里稷山縣界下有泉曰漉漉
其水清如漉而自出也

黑石山在萬泉縣東南三十五里石色青黑其材可
作碑

栢林嶺在孤山東南隅上有崑崙臺

雕石嵯在孤山南峪有雕常巢其上嵯下有泉

峨嵋嶺卽猗氏峨嵋岡所衍行者自臨晉入萬泉縣境至此獨隆起故以嶺名

桃花洞在孤山南麓舊多於此種桃故名元時仙人劉海蟾羽化於此有登仙石遺迹

峨嵋坡自萬泉衍而西至滎河縣城東上多平岡東南一峰差聳曰靈吉自此西屬於河而峨嵋之脉盡矣其綿亘起伏蟠穿數縣幾二百有餘里云

黃河在府西城蒲津門外五代宋時距城止一里後

西壘遠去五里餘明初時復漸東移近城下隆慶

四年河大漲溢入城是歲徙道穿朝邑而南移大

慶關於東岍萬歷八年復決而東齧自後又西徙

十餘里 國朝康熙三十四年復東徙今距郡城

五里河自龍門下由河津入榮河縣河在縣西去

縣七十步行縣境六十里其西岍爲陝之韓城自

榮河入臨晉縣河在縣西三十里行縣境四十里

其西岍爲陝之郃陽自臨晉入永濟縣行縣境五

十里至郡西郭外其西岍爲陝之朝邑自郡西行
縣境六十里轉而東行其南岍少西爲潼關自潼
關又東行縣境六十里其南岍少東爲河南閿鄉
凡河帶郡境西北繞郡西南過縣三行地二百七
十里東達於芮城

水經注河水自皮氏縣西又南出龍門口又南逕
梁山原東又南逕高門又東南逕司馬子長墓北
又南逕子夏石室又南逕汾陰縣西又逕邠陽城
東又南逕陶城西又南逕雷首山西又南歷船司

空與渭水會又南流潼激關山因謂之潼關自華
陰潼關東北流又東逕閬鄉又東逕河北縣南又
東逕芮城

汾水源出寧武分水嶺逕太原汾州平陽入絳州稷
山由河津入滎河縣古以水南爲陰故滎河舊爲
汾陰地矣至唐改汾陰爲寶鼎元和郡縣志云汾
水在寶鼎縣北二十五里滎河志云汾水在縣北
后土祠傍西流入於黃河水經注所爲河南出龍
門口汾水從西來注之者也明隆慶四年河旣改

道同時汾亦東徙由河津縣葫蘆灘南入河今在
滎河者爲枯瀆

涑水源出絳縣橫嶺山伏流而出西經聞喜夏縣安
邑至猗氏臨晉涑水經猗氏者在縣南六里經臨
晉者縣東南二十里臨晉志云其故道自卿頭鎮
西南合姚暹渠入五姓湖明弘治十六年御史曾
大有以姚渠首中太狹涑水闌入爲鹽池害疏請
濬河八十里自猗氏崔家灣開引稍西經智光水
頭觀底胥村城子埒薄落頭諸村入五姓湖達孟

明橋入黃河

郭爲觀有涑水故道考載藝文

媯水在永濟縣南六十里水經注歷山有舜井媯汭
二水出焉南曰媯北曰汭通志云二水東西相距
二里合流入黃河

王肅註尚書以媯汭虞地之名而非其水孔安
國書傳訓汭爲內云居媯水之內皇甫士安從
之馬季長則以水所出曰汭又爾雅水北曰汭
後多以媯汭分二水然傳記所言洛汭渭汭正
與媯汭同豈得亦分渭洛與汭爲二乎以爲二

水不同出而東西相距因欲異其名則桑乾濟
水諸大川皆有數源異出同注然總爲一名是
則汭之於媯原本一水不得強分而安國所訓
於義爲允矣

五姓湖在永濟縣東三十五里臨晉縣西南四十里
虞鄉縣西北二十五里三縣界會處也平陽府舊
志湖傍村昔有五姓居之故以名湖亦曰五姓灘
考厥所從蓋卽古之張澤矣水經涑水南過解縣
東又西南注於張揚池酈元注云涑川又西南逕

張揚城東漢書之所謂東張矣曹參與韓信東攻
魏將孫林邀軍東張大破之卽斯城也涑水又西
南屬於陂陂分二城南面兩陂左右澤渚東陂世
謂之晉興澤東西二十五里南北八里西陂卽張
澤也西北去蒲阪一十五里東西二十五里南北
四五里冬夏積水時有盈耗明時舊志云湖傍昔
多樓臺居人環繞每夏荷花盡發爛若霞錦雜以
綠蘋紅蓼漁人罟師水鳧沙鷺欸乃間作飛浴相
翔致爲勝觀其後景物盡變惟湖光一片數十年

來水益就涸乾隆癸酉歲秋雨既盛復見漣瀾瀾
瀦云湖中有大堤南北相屬堤上有橋若行畫中
湖瀕舊有明襄垣王子所營別墅獨擅幽奇滄桑
以後淪滅無跡矣

鴨子池在五姓湖東水經注所稱東陂之晉興澤也
王官谷諸水經流注此通志云東起鴨子池西接
蒲州孟明橋六十里皆水鄉也

舜井在東關古城舜祠內東西二井相對宋真宗改
廣孝泉命王欽若記焉州舊志地鹵水鹹井獨甘

美

義井在城東峨嵋原明成化中知州蔣容穿以飲道渴者

寒谷澗在永濟縣東南百里地曰觀後南流入於河平陽府志疑其卽山海經之共水然經所爲甘棗之山今旣不能指其何是而芮城志或又言在其縣中則澗非共水矣以今考之是卽水經之永樂澗而酈道元以當山海經渠豬之水者也以出永樂故後卽名之永樂澗所謂寒谷又

變稱於其後者耳水經河水過河北縣南又東
永樂澗水注之夫今之永樂爲漢魏時河北縣
地且又處其縣之東以桑欽酈元所言求之其
爲永樂水無謬也

東澗西澗二澗並在萬泉縣東澗在城東門外孤山
北壑中出隨地湧泉北流六里西澗在西門外雙
澗夾城分流相帶如匹帛之繞叢花西澗水亦北
流凡三里與東澗俱入於沙或云伏流地中也

平陽志云萬泉縣止數井民用不給取給澗水

其餘村落中井不過一二甚有村無井者則儲
雨雪以供用或遠汲他處動踰一二十里蓋地
以穿井爲艱深者百丈淺者亦八九十丈且穿
一井其費既多甚有穿之至深終不得泉者是
以井少人尤苦之

神龍潭在永濟縣東南十五里大谷村

玉龍潭在永濟縣東南十五里讚歎寺下

泓龍潭在永濟縣東四十里龍祥觀後

水谷潭在永濟縣東南二十五里水谷村

黑龍潭在猗氏縣西南久塞邑人王含光濬之開水

田後復淤

雷澤在永濟縣首陽山下南流入河相傳舜漁於此

水經河水又南逕雷首山西又南涑水注之酈

注水出雷首山有夷齊廟其水西南流亦曰雷

水穆天子傳壬戌天子至於雷首犬戎獻良馬

四六天子使孔牙受之於雷水之干者是也據

酈此言則俗所指雷澤者正是穆王時雷水且

道元之注於古無不採使舜果漁此彼寧或遺

之而絕不及者知其無與於此也夫雷澤審在
定陶而好事者因水有雷名且不知世有周穆
之事特欲以附於舜故爲辨如此

玉洞泉在永濟縣永樂鎮純陽觀後與寒谷澗水並
入河

今永樂鎮傳云有玉澗及皇天原按水經注云
澗水南出玉溪北流逕皇天原西周固記開山
東首上平博方可里餘漢世祭天於其上名之
爲皇天原有武帝思子臺又北逕闌鄉城西世

亦謂之閬鄉水據此則玉澗與皇天原明並在河南此不得有後人以唐李商隱號玉溪居永樂遂以玉溪卽玉澗非其實矣

桑落泉在郡城外東南五里土龜原后土祠下舊以北甌末劉白墮桑落酒得名唐河中有芳醞監李肇固史補云河中桑落坊有井釀酒甚佳依此則泉本古井而其地舊亦當在郭中也今泉亦縮無釀者

蒼陵泉在永濟縣東南十五里王莊卽谷口水源也

柳溝泉在棲巖寺東

大黃泉在永濟縣中條北麓

觀音泉在永濟縣鹿谷上有白石寺泉出谷西流入河

梨花泉 龍母泉並在永濟縣中條山大谷中

大谷水泉在永濟縣東南十五里北流入姚暹渠大凡蒲之諸泉皆源出中條唯桑落自地發也

諸志永濟縣有飲馬泉引唐高祖破桑顯和於此考高祖留兵圍屈突通於蒲州而自由朝邑

蒲津渡河遂破隋將桑顯和則飲馬泉蓋乃同
州者不得以名之偶合而遽附於此

瀋泉二一在臨晉縣西三十里黃河吳王渡岍側一
在榮河縣南二十五里南趙村西距黃河三里洳
沮方丈郭恒農山海經注云河東汾陰有瀋水源
在地底潰沸湧出其深無限名之曰瀋馮翊邵陽
縣復有瀋亦如之相去數里而夾河河中渚上復
有瀋源皆潛通在汾陰者人壅其流以爲陂種稻
呼其本出處爲瀋魁此正榮河者也其泉久隱明

時知縣侯祁相地脉掘得之於是漢湧如故明一
統志漢泉水有三一在同州一在郃陽一在臨晉
臨晉志有桑泉謂其水久堙 國朝康熙十二
年知縣潘士瑞探古搜奇故老有識其處者乃
尋東北溝掘之得甘泉焉桑泉雖見於左傳特
地名耳豈必實以泉士瑞偶掘得泉亦無足異
乃欲詭爲卽古桑泉甚不須爾

鴛漿泉在方山之巔其名見於水經注及郭璞山海
經注其水已久堙相傳其下至深惟物宅焉明隆

慶間霪雨或言方山白龍爲祟御史邵永春以鐵牌黑犬厭之是夕大雷雨折山巔塔龍移湫去

蘆泉在王官谷內味甘冽

文波泉在猗氏縣東北仁壽寺右自城東遶南入涑水泉時溢則縣多科第故名今久闕

雙璧泉在猗氏縣西北五里靈巖寺後明萬歷十八年二泉湧出南流五十步復止後每泉出則邑人多父子成進士者

暖泉在萬泉縣孤山之陰數穴湧出隆冬不凍東澗

之流此水居半

檻泉在萬泉孤山西麓初欲建寺無水傳有白兔入穴掘之得水因名兔泉後改檻泉

聖水泉在孤山之陽大旱不竭

鵬石泉出孤山鵬石崖南流合於聖水

竹溪舊在永濟縣東十里石莊有竹溪寺後湮

貽溪在王官谷內唐司空圖所名

石筍溪唐盧綸有奉陪渾侍中遊石筍溪詩今不知

處或云在中條北麓下

王官雙瀑布在王官谷內天柱峰傍東西二瀑西者尤奇勝方冬脉微循嵯而流涓涓一綫至春夏飛湍直下望之若練所注處石皆成穴珠玉噴跳夏月遊人數十步外寒氣森逼東瀑嵯稍曲湍亦差緩嵯上蒼苔匝生歲久皆玲瓏爲石如羊腴狀二瀑經休休亭前合流出谷散入田野間居人引以灌溉引水溉田之法以時刻計名一分水傳自司空表聖所定至今用之不廢凡王官之水以分計者一百一十九焉其引溉所及遠近至十五里

穆陵關通志云在榮河縣北十里南北開朗至關則東西兩山壁立如門車不能方軌舊有石刻曰古穆陵關

蒲津關卽漢臨晉關唐改蒲津宋祥符中復改爲大慶關本在黃河西岍朝邑界隆慶四年河穿朝邑南行移關東岍與蒲州接今去郡城西門五里爲秦晉分界處

風陵渡在永濟縣南六十里黃河北唐大歷中於此置風陵關明洪武八年設風陵巡檢司屬潼關衛

國朝雍正五年改衛爲縣山西巡撫疏言風陵渡
巡檢司向隸潼關衛而駐在蒲州今改縣廢衛其
風陵巡檢之俸工亦歸併潼關縣是巡檢司竟隸
陝西恐晉省不能責其效用矣請令駐劄渡口隸
山西爲便於是司屬永濟至乾隆四年復移歸潼
關

永樂渡在永濟縣東南一百二十里黃河北明洪武
四年設巡檢司今廢

吳王渡在臨晉縣西三十里明初於此設巡檢司今

久廢其南爲夾馬口渡

汾陰渡在滎河縣金時遣南陽郡王代祀汾陰后土祠所設久廢

白馬渡在滎河縣南十里元時設久廢

新渡口在滎河縣北十里

黃河堤堰在郡西門外其舊堤自唐世有之北宋時繼有繕築然不時圯明初修於守臣自成化至正德初僅歷三紀已六興役於是河東道王天瑞議大築之爲經久計召屬吏父老告以修堤護城預

防決溢乃程工計事北起古官道灘角南抵河濱
廟用石工三十人採石龍門虞鄉山中得石八千
餘片琢版長五六尺以民車船運載之市松栢木
椿七千餘鈎心鐵錠一萬餘觔用夫匠三百餘人
併力致功凡期年逾五月而堤成長二千五百尺
給事史魯爲之記自天瑞隄石堤之完固者四十
餘年至嘉靖乙卯地大震堤岍盡崩於是河流每
漲直入城郭隆慶四年夏黃河漲高丈餘浸及蒲
城時楊尚書博家居議復修堤堰使富民出金數

千沿河築土堤三百餘丈以衛城郭至萬歷庚辰
夏河自迤北南流直衝蒲城西岍古七里渡日崩
岍數十步勢將大潰人盡震恐河東道王基乃請
之山西巡撫議建石堤以捍洪災未幾河東道宋
應昌繼至請如基議乃檄平陽府發府庫所貯歲
收各縣大戶餘名銀六千七百有奇不足官復籌
與之凡先後工費銀二萬六百有奇召匠採石於
河津之乾柴溝市栢木爲立椽具燔石爲灰於條
山之中物用備具衆議堤薄則不足捍激湍乃立

址樹廓加頑石三尺雜灰土堅築以實內基復煑
米汁和灰砌石冶鐵灌之使相膠合以固外身通
計新堤自北徂南長一千三百一十九丈堤高出
河上數尺屹如重城始萬歷庚辰歷四載至癸未
乃竣王尚書崇古爲碑紀功自堤成之後河亦西
翼去城稍遠無衝齧摧剥之患計萬歷癸未至今
乾隆甲戌百七十年河壩久淤爲陸而堤岼巋然
獨存其砧砥駢輦處尚如故

連城堰

橫渠堰二堰並寬一丈長三十丈

玉龍堰寬一丈長五十丈三堰舊在郡城東北明知
州許鵬以城東原溝阪深峻大雨輒壞田稼兼積
水無洩乃於州東大通廂穿渠曰永濟州北復安
里古城下穿渠曰溥惠復爲三堰以障渠水之勢
使無入郭中其渠後皆湮堰亦夷漫矣

蒲津橋唐明皇帝所製浮橋也杜佑通典河東有蒲
津關大唐開元十二年於黃河兩岍開東西門各
造鐵牛四并前後鐵柱十六其牛下并鐵柱連腹

入地丈餘唐書云開元十二年鑄八牛牛一人策之牛下有山皆鐵也夾听以維浮梁十五年自朝邑移河瀆祠於此張說蒲津橋贊河上有三橋蒲津是其一今人牛山柱俱存

考東魏時齊獻武王高歡造三浮橋以攻西魏西魏大統四年丞相宇文泰既定秦州造浮橋河上通往來又隋文帝至河東亦造浮梁皆在蒲津通典云橋自後魏迄唐初皆橫絙百丈連艦千艘少敗輒更歲費不訾於是開元十二年

明皇帝始下羣議乃鑄人牛山柱夾維兩岍久
成安固沿至宋金尚承舊製宋熙寧元豐中累
勅知河中府修河梁堤圻金時設大慶關勾管
河橋官一員掌解繫浮梁濟渡舟楫巡河修埽
率埽兵四時功役栽植榆柳預備物料譏察奸
僞等事同勾管官一員至金末河橋爲元兵燒
絕後始廢

舊志宋嘉祐八年秋水漲梁壞鐵牛沈沒有真
定僧懷炳以二大舟實土夾牛維之用木鈎牛

徐去土船浮牛出梁得復成詔賜炳紫衣

孟明橋在永濟縣東十里傳爲秦孟明焚舟渡河盟師之處凡姚暹渠諸水入河必流經其下

貫底橋在臨晉縣東南二十里係官路通衢

涑水橋在臨晉卿頭村明洪武十六年縣主簿章琛以石建

涑水橋在猗氏縣東南八里爲西北鹽車所行要路明萬歷三十一年巡道詹思虞建

永利橋在萬泉縣西門外唐時所建圯於明嘉靖中

知縣王大節修隆慶中知縣李廷陳移建舊址之
北易以石行者便焉後天啟時縣令范文原擬改
建未果繼任劉大猷成其事縣人更名其橋曰三
賢

涑水渠舊在蒲州東三十里唐貞觀十七年刺史薛
萬徹所開於虞鄉縣北十五里穿渠自聞喜引涑
水下至臨晉考桑欽水經涑水出河東聞喜縣黍
葭谷水經注謂之華谷其故道自安邑縣入郡之
猗氏經鳴條岡李漢村折而南又折而東南經張

河孫塢諸村又折而西南歷楚侯王鑑諸村又西南逕太侯上庄及解州之南扶諸村自此又西南經臨晉之卿頭諸村與姚暹渠分南北流並入五姓湖由永濟縣達於黃河元時司解鹽者慮涑水時溢浸敗鹽池乃自安邑北相鎮之西北開新道引使北行經三里高頭原頭水南香落諸村至崔家灣復折而南至臨晉於是涑水始與姚暹渠合矣明弘治十六年巡鹽御史曾大有復自崔灣浚新道八十里益引而西經祁任智光諸村至蒲州

由孟明橋入河水所經注多資灌溉明隆萬中屢
修堤築 國朝雍正中議分設虞鄉縣時戶部侍
郎王某刑部侍郎韓光基先後奉使至各議於涑
水河建閘啟閉蓄洩以資灌溉備水潦乾隆十年
秋涑水大發崩毀堤堰當事奏請修濬或議求涑
水故道開而復之於沿河南岍築堤以禦決溢使
順軌西流歸五姓湖然久至數年未及行於時涑
水及姚暹渠沙土壅淤而五姓湖亦久遏塞十八
年秋霖雨彌月水漂瀑無所歸至冬時尚漫宿田

野河東兵備道喬因解州知州請修渠河乃使與蒲州府知府會勘涑水姚渠形勢卽議修濬其年十二月合條具修河事宜以上明年正月河東道喬言於撫藩二憲謂河渠及五姓湖閉淤有年致連歲夏秋水稍多卽易泛溢各邑不能沾水之利而反受其害者非一日更可慮者每年涑河漲怒一切田廬皆成澤國且恐水勢勇猛潰裂逼渠橫決所至則虞鄉解州城郭及大小鹽池其危險有不可勝言者此河渠之速應修治斷不可緩若

夫河則向資民力渠則商力疏通歷來舊例行之
甚便二憲以爲允乃命各有司卽於其春興役其
涑水自安邑以東者解州主之自猗氏以西者蒲
州主之涑水在蒲州始自猗氏歷臨晉永濟至河
地一百里長一萬八千丈舉功於三月戊辰訖四
月癸卯凡三十有五日其用民力唯引灌所及者
使里出之灌不及者役勿與其夫永濟凡二萬一
千六百人臨晉九萬六千六百九十人猗氏七千
五百六十人各以地之短長多少難易分任焉旣

成淺疏壅決自湖達河經流通暢潦之積而未消者皆歸其壑田之漫者悉出凡數百頃漸可復耕三縣之人以爲利彤家者曰明時湖水常滿而涑無絕流故科第仕宦爲盛自近百年涑水幾不西至而湖亦就堙是以郡少達者今疏之使復其舊非特歲免沉菑亦郡人仕進之利也

姚暹渠古永豐渠也按史乃後魏正始二年都水校尉元清所開引平坑水西入黃河以運鹽隋大業中都水使者姚暹重開之決堰濬渠民賴其利故

以之名宋仁宗時轉運使王博文言解州安邑至
白家塲古永豐渠行舟運鹽不至勞民自唐末至
五代迄今湮沒水甚淺涸舟楫不行詔相度以聞
明時朱實昌爲御史有修渠記云姚暹一渠所以
受山谷之水由苦鹽池入五姓湖以達黃河自唐
以來湮沒至今予使加濬焉渠在鹽池北十里古
開之以洩東南山澤之聚流因堅其堤以障之渠
受東南之水其派有四其經流由於平陸之橫嶺
嶺北水聚成澗至夏縣之王官峪口而北出東流

過抱珠山又東過史家峪與雕厓溝八澗諸水合
於小呂村又東三里許有巫咸河自南來會轉而
北流河之東有白沙堰又北三里許爲朱呂村有
朱呂橋李綽堰姚暹渠與分界於此自此以北遂
名姚暹渠凡渠之起自夏縣歷安邑解州至蒲州
府之虞鄉縣入五姓湖綿亘一百五十餘里蓋解
鹽池每患水敗自有渠以刷諸水則有所歸漚不
致浸入鹽池而其利亦資灌溉 國朝乾隆十年
渠身淤塞水無所容致泛漲爲害諸商人乃於十

一年公共捐銀大加濬治至十八年渠身不能通暢下流更多阻壅時秋雨過多渠水大溢解州之西王村諸渠堰爲所冲蕩解州城西之硝池悉被漫沒於是河東道喬因解州知州請修河渠遂使與涑水河同時疏治以刷聚水而衛鹽池凡渠由解州而入其屬之虞鄉者地曰曾家營申家營土橋牌首村棗圪塔諸村落皆渠所經並疏深之使達五姓湖又以湖爲渠河之尾閭若下流壅則不能行水并湖濬之使達於黃河虞鄉縣以四月興

役已而工竣所役凡三萬七千一百有四人

雞心灘在永濟縣西南黃河中初河決朝邑移陝之大慶關於東岍由是朝邑與蒲界接而河壩水涸沙渾可田者秦晉人雜耕其間久之相爭至於鬪殺康熙十三年始令山陝巡撫會勘於大慶關東立牌界分秦晉築牆植樹限制其人定山陝刁民例示以嚴誅然其民皆愚悍貪利而永濟長旺諸里民悍桀尤甚雍正七年復以河灘大訁乃遣工部侍郎馬爾泰出按視爲丈其地平分焉至乾隆

三年河中復漲一灘長可十五里其廣五六里秦人呼曰夾沙晉人名以雞心方灘之生永濟朝邑華陰之人並就盜墾而私爲之界及十二年永濟民欲得全灘種之揚言昔本以大河爲界今秦人實據我耕地朝邑華陰人則謂分耕灘地已久安得獨歸晉且界故不以大河也於是復鬪如初兩省大吏各遣官會視將平其爭然會者議各以私久不決時今河東道喬方知同州府奉檄與蒲州知府李及永濟朝邑華陰三縣令再勘焉議分已

定上之兩巡撫並是其議即以奏於朝章下戶部
戶部請下山陝巡撫再委官吏詳按審核之必使
均平不致復爭於是晉撫委雁平道葛歸綏道卓
秦撫委榆葭道禮潼商道李以乾隆十三年四月
十五日期會河上雁平潼商道等公勘得灘屬河
中介在秦晉之間唯晉之瀕河村民種灘者數多
而秦民瀕河種灘者少應將此灘除去四圍嫩沙
不可田者外其灘中已熟之地并未種老灘均以
六分給晉民四分給秦民其應分界限請起自原

築界牆之南就其地勢眠弓之形灣環對照灘之東頭鳳凰觜一並照前築牆立界至其地之頃畝應令各知府縣令及蒲州永樂潼關撫民二同知公同丈明分給卽於乾隆十四年起租并以灘地及佃種者授之撫民永樂同知使主收其租課而於耕穫之時會同營汛前往巡查彈壓倘有侵佔爭鬪等卽以山陝刁民例罪之先是山西巡撫奉旨與陝撫面加商度乃於十四年二月兩巡撫亦偕會灘中及得雁平道等議並以爲允卽採其

言入告報可於是以四月十五日原勘諸道府縣
令共丈灘地計二百二十二頃九十九畝有奇永
濟分地得一百三十六頃四十六畝餘其在秦者
朝邑分地得五十三頃二十畝餘華陰分地得三
十三頃三十二畝餘灘地之勢西厚而東薄方丈
量時除去東灘瘠土濶三百步許不在分列則同
州府之意以晉民所得地薄用折而補之俾無偏
私初戶部以灘地利多稅輕故民爭無已將重爲
之賦秦晉二撫議下有司永濟諸令並以灘多鹺

瘠非膏腴比且有無不常每歲畝租但可得五升
憲府因戶部言駁難數四後定一斗爲額云凡灘
之役始乾隆丁卯春訖庚午五月先後凡四年河
東道喬記其事

考之史後周保定二年初於蒲州開渠以廣灌
溉宋時轉運使薛顏卽蒲津北灑黃河上流爲
支渠殺水怒河中浮橋乃不爲水所敗因取渠
水溉傍田民頗利之又紹聖中知河中府游師
雄立渠堰中條下引蒼陵谷水注之人賴其利

今周宋時所置渠已失其跡唯萬徹所開涑水及姚暹二渠存至今然時失疏治卽爲患且涑水始與渠分自其後合流而患尤易致其衝毀堤堰以敗鹽池及災民田者亦屢見矣然其害要皆由於河渠之壅壅則無以行水而瀑溢泛濫勢必至焉故或疏或導歲宜事之雖然治其原而不治其委非計之宜夫五姓湖又二水之委所以受此而與爲轉輸者也使湖不治而致其湮遏是猶病噎者食不下而嘔將作矣此又

不可不知者也

蒲州府志

卷之二

三

蒲州府志卷之三

古跡

陶城

水經河水又南逕陶城西酈元注云舜陶河濱
皇甫士安以爲定陶不在此也然陶城在蒲坂
城北卽舜所都也南去歷山不遠或耕或陶所
在則可何必定陶方得爲陶也道元謂帝都此
城亦未必信然陶邑之名因城乃有自唐至今
千載無改跡紹遠古永復傳之今郡城北三十

蒲州府志 卷之三
里陶邑鄉卽其處矣

虞都古城

括地志在蒲州東南水經河水自陶城南過蒲坂縣西注云皇甫謐曰舜所都也以今考之當卽戰國秦漢時蒲坂舊城王莽所改蒲城者舜之故都亦在此焉然後世城郭之制自禹而始方當舜時雖都其地不必卽有城以後世之城爲虞都所築母乃失之

郇城

在猗氏縣南十八里古郇伯之國周文王第十
五子所封處也水經注涑水西逕郇城服虔曰
郇國在解縣東蓋郇瑕氏之墟猗氏志言城高
二丈許四垣八門遺址宛然

令狐城

括地志令狐城在猗氏縣界十五里通典古有
令狐城晉文公從秦返國圍令狐卽此猗氏志
云在今縣西十二里令狐村或言晉時於此置
戍亦曰令狐戍

桑泉故城

在臨晉縣東北十五里春秋之桑泉地今亭東村南小蓋原是其處左傳僖公二十四年晉公子重耳濟河入桑泉杜征南注在解縣西二十里北魏志南解縣有桑泉城

古解梁城

臨晉志云在縣西南三十里五姓湖北其跡至今猶存

古瑕城

後漢郡國志解有瑕城地道記左傳文公十三年詹父處瑕杜征南注郇瑕古國也水經注涑水又西南逕瑕城又西南逕張揚城括地志張揚城在虞鄉西北四十里京相璠曰河東解縣西南五里有故瑕城今臨晉西南三十里五姓湖者卽古張揚城處以水經注京相璠之言考之古瑕當卽臨晉城外西南地久從湮佚矣

晉陽故城

史記魏世家秦拔我陽晉封陵正義云陽晉當

作晉陽也括地志晉陽故城今名晉城在蒲州
虞鄉縣西三十五里六國表云魏哀王十六年
秦杜陽晉卽此城也通志云今地在永濟縣東
四十里

汾陰故城

在今滎河縣北九里諸志並不詳所始按水經
注則魏文侯所築也周威烈王十七年文侯伐
秦還築汾陰卽此是矣括地志云汾陰故城俗
名殷湯城在蒲州汾陰縣北魏土地記云汾陰

城北至汾水三里也

基城

在永濟縣南八十里舊志云不知所朔始以址存故名今爲基城里據舊志所云則基之爲名亦以俗稱而然非其本也史記魏哀王十六年秦拔我蒲坂陽晉封陵括地志謂陽晉在虞鄉縣西封陵亦在蒲州史記正義云封陵在古蒲阪西南河曲之中然則俗所謂基城者疑卽魏封陵之舊築耳

張揚城

水經注涑水又西南逕張揚城漢書之所謂東張矣高祖二年曹參假左丞相與韓信東攻魏將孫林邀軍東張大破之卽斯城也北魏地形志北解有張揚城括地志張揚故城在虞鄉縣西北四十里是唐時猶存臨晉志云今無跡

北解故城

北魏太和十一年所置在臨晉縣東南二十里縣志云城卽桑泉之故治自魏置北解至隋改

桑泉卽此故城而更名者明隆慶五年居民於城內掘地獲桑泉縣印一顆意是隋末縣令遺棄者可證北解桑泉古無二城也

越城

在蒲州北門外周一百三十步舊志云西魏大統九年大丞相宇文泰築以防越渡故以越爲名考是時西魏已得蒲州定汾絳高齊與黑獺所界而爭者已非賀六渾浮橋之舊且是時齊稍畏周不能入河關而西又何越渡之有而周

於此築城以防之哉蓋後五代漢遣大將郭威
討李守貞於河中威作三柵環其東西北面城
疑卽威所爲者威爲天子亦號周故或誤爲宇
文耳若夫越之爲名恐亦後世時俗所稱者若
基城然而非其始志又云或傳魏豹所築盛兵
蒲坂以塞臨晉卽其不決者已兩端矣

北鄉城

北魏地形志汾陰縣有北鄉城又有后土城舊
志云在萬泉城北一里許亦後魏所置

王官壘

在虞鄉縣東南十里近王官谷左傳秦伯伐晉取王官者也

檀道濟壘

在永濟縣南六十里河曲地晉義熙十三年宋武帝伐秦遣冠軍將軍檀道濟等以兵先行道濟渡河結壘於此使建武將軍沈林子攻秦河東太守尹昭於蒲坂水經註宋武入長安檀道濟王鎮惡大小七營濱帶河險南則河濱姚氏

之營與晉對峙

北平故壘

猗氏志云卽北城地也在北平莊武王馬燧廟
後燧討李懷光時築壘於此版築之跡異於他
處猗氏人謂其地爲古縣云

武壁

在滎河縣黃河坼側縣志云皆元至正末所築
凡八砦曰汾陰胡壁趙村薛戍薛堡連栢西倉
禹門以薛壘居中可制諸營移中軍其上更名

武壁周一千二百步面臨絕澗北開一門今址存張昌有武壁門記

李樂營

舊志在條山南漢興平二年十二月獻帝渡河幸李樂營河東太守王邑獻綿帛

舊志雖載此以爲古跡然考後漢書獻帝紀自陝渡河至安邑三國志亦云天子走陝北渡河唯皇后貴人從至大陽楊奉韓暹等遂以天子都安邑三國志註云初議者欲令天子浮河東

下楊彪劉艾等以爲河險而止及當北渡使李
樂具船又李傕郭汜追獻帝於弘農之曹陽楊
奉急招故河東白波帥韓暹胡才李樂等合與
傕汜戰奉兵敗天子走陝則李樂營宜不在此
也

齊王砦

在臨晉縣西北十里齊王村東南縣志云舊說
韓信屯兵擒魏豹處

秦王砦

在萬泉縣東三里縣志唐太宗爲秦王時立砦於此

樂里山砦

舊志云在中條山北金將侯小叔駐軍處

永樂故鎮

在永濟縣東南一百二十里後周置永樂郡唐置永樂縣宋罷縣爲鎮今駐永樂同知署卽唐永樂縣治址之舊也

合河故鎮

在永濟縣風陵鄉去縣南六十里金時所置今

爲匡河

虞鄉故鎮

周置虞鄉縣歷唐宋金至元罷爲鎮今仍其處

爲縣焉

神羗堡

在臨晉東北十五里傳東漢初高密侯鄧禹定

河東圍安邑時屯兵於此

河曲

在永濟縣南六十里黃河廻曲處春秋秦晉戰
於河曲杜註曰蒲坂縣南也

雕上

在滎河縣北汾水上水經注有長阜背汾帶河
長四五里廣二里餘高十丈汾水歷其陰西入
河漢書謂之汾陰雕應邵曰雕丘類也如淳註
漢書曰雕者河東岍特堆崛后土祠在西顏師
古曰以形高起如人尻雕故名漢時汾陰男子
公孫祥望氣寶物之精上見言之武帝獲寶鼎

焉卽此處也一曰魏雕汾陰巫錦爲民祠魏雕
師古曰汾雕本魏地之墳起者故曰魏雕明隆
慶中雕淪於汾

昆田

在首陽南漢武詔曰朕禮首山昆田出寶物注
曰昆田首山下田也

沙邱亭

後漢郡國志蒲坂有沙邱亭在縣南

狐谷亭

郡國志汾陰有狐谷亭今滎河縣南趙村有漢
魁泉卽郭璞爾雅註所說者漢時亭與漢近也
鄧邱亭

水經注汾水西逕鄧邱北故漢之方澤也賈逵
云漢法三年祭地汾陰方澤澤中有方邱故謂
之方澤邱卽鄧邱也宋祥符四年真宗祀后土
禮成登鄧邱亭以望河汾古鄧邱在汾睢之東
漢舊儀云睢上一曰葵上顏師古曰地本名鄧
音與葵同彼鄉人呼葵如誰因轉作睢耳鄧邱

水經注獨作鄧以爲許慎說文稱從邑登聲則所學之異隋陸法言廣韻亦爲鄧同漢儀師古之說也

二妃壇

宋永初山川記蒲坂城中有舜廟城外有舜宅二妃壇舊志云蓋祀娥皇女英處也今名娥英陵在蒼陵山谷上

朝覲壇

宋大中祥符四年祀汾陰築在故后土廟側

掃地壇

滎河縣志舊在汾陰祠左有坊樹焉以爲軒轅
掃地而祭之所元時設者今崩於河

崑崙臺

在萬泉縣南孤山上舊傳漢光武所名登此以

祀風伯雨師

雙市門

在東關古城金元帥左都監侯小叔夜復河中
府殺元將石天應於此

郎君谷

在中條山麓唐王起爲河中節度使其子龜性
好幽遠結廬中條與山人道士遊人指起草堂
處爲郎君谷

鳴珂里

在猗氏城內西南唐張嘉貞三世宰相所居號
鳴珂里縣志云三相坊以張氏舊居故名

敬愛里

在永濟縣南永樂鎮中唐貞元中表孝子姚栖

雲改其鄉名曰孝弟社曰節義里曰敬愛今山
南猶有節義里乃其餘跡也

萬歲宮

三輔黃圖汾陰有萬歲宮武帝祀后土時作

首山宮

在首陽山漢武紀元封六年春作首山宮

蒲州宮

周武帝宣政元年建

奉祇宮

唐開元十一年祀汾陰建

太寧宮

宋祥符四年祀汾陰建奉祇大寧爲唐明皇宋
真宗祀后土駐驛行殿宋大寧宮中有穆清殿
祀畢享羣臣其中又有延寧亭爲登眺處並在
古后土祠左二里今其跡無可考矣

綠莎廳

唐河中府有綠莎廳爲諸書記從事趨府會宴
之所其中芳莎被庭縛翠可玩宋治平中猶尚

如昔居此廳者曰使隸人引水澆澤之王元之
有詩曰綠莎廳事舊鳴蛩是也後毀

逍遙樓

舊志云在州北城上不知何時建唐明皇登此
有詩後廢

鸛雀樓

舊在城西河洲渚上周宇文護造李翰有序云
宇文護鎮河外之地築爲層樓遐標碧空倒影
洪流二百餘載獨立乎中洲以其佳氣在下代

爲勝槩唐世諸公尤多題咏歷宋至金明昌時
尚存有河中府錄事李達書樓額元王惲登鸛
鵲樓記云至元壬申三月由御史裏行來官晉
府十月戊寅按事此州遂獲登故址徙倚盤桓
逸情雲上雖傑觀委地昔人已非而河山之偉
風烟之勝不殊於往古是當元初樓已就毀舊
志云明初時故址尚可按後盡泯滅或欲存其
跡以西城樓寄名曰鸛鵲又唐楊巨源詩魏國
山川在白樓盧綸有九日陪渾侍中宴白樓詩

或言白樓卽鸛鵲也

避暑樓

隋文帝建在中條棲巖寺

薰風樓

州志云在古城街中唐廣明中河中節度使王重榮與黃巢將戰誓衆於此後戰勝建樓紀功以克復名之宋祥符四年真宗幸河中登樓問故事因曰克復者一時之事不如以舜舊都改勝曰薰風且命陳堯叟爲記刻石元末燬焉後

無復興者至明崇禎九年守道李一鰲建樓三楹於面城高處未幾亦廢州人猶呼其處爲薰風臺云

費君書院

唐時費冠卿讀書院在中條五老峰下楊巨源有題書院詩

四桂堂

金李獻能獻卿獻誠獻甫兄弟相繼擢第故以四桂名堂擬燕山五桂舊在河東縣東南二里

久無跡

安民堂

宋錢晦知河中府仁宗飛白書安民二字賜之
至和二年建安民堂於府衙元祐中重建
去思堂

舊在城中金時河中人爲知府張萬公建

唐河亭

在城西門外黃河坼上任中丞所作爲觀遊勝
賞之地題咏多見唐人詩集中今無址

五代爽心亭

在萬固寺後山麓五代時寺僧紹月所建今無

址

宋望川亭

在州東南中條山棲巖寺側宋宣和二年建舊

志云西望秦川如在几席明萬歷十年王尚書

襄毅重修

宋瑞雲亭

在中條山上今無址

秋風亭

在滎河后土廟前元時建刻漢武帝秋風辭於
石貯之亭下因名亭爲秋風明隆慶中亭石俱
淪汾川

唐閻案使君宅

舊志云在中條方山使君棄官爲道士求仙居
此與羅通微並化去

唐呂洞賓宅

卽今永樂純陽宮其所居宅也

唐盧綸故居

傳在棲巖寺東

唐李義山故居

在永樂義山居永樂詩見藝文

唐司空表聖隱居

在中條王官谷表聖山居記其中有三詔堂九
籥室證因擬綸修史休休覽照瑩光諸亭至宋
時虞鄉令樂沆卽其地構堂祀表聖目曰表聖
影堂其後盡廢今王官谷中尚存丹陽觀云是

其故隱也

宋樂安莊

在東關古城東北隅宋樞密直學士薛卣致仕
歸築因其封郡名之樂安有逸老堂知府范純
仁爲記

金麻長官成趣園

在中條下元裕之爲賦詩

明王處士巢雲阿別業

在中條山麓處士名旦爲園曰頤真復名巢雲

阿舊志稱其地爲中條第一佳處

明蘆花散人別墅

在五姓湖濱襄垣王子俊嶸所築其自記云地
偏心遠軒榻皆幽烟波渺瀰沙鳥上下秋則蘆
花吹雪夏則蓮葉披雲把釣浮舟開窗待月村
樵漁子共話田園可以忘老豈直世榮之俱淡
耶今與處士巢雲阿並廢久矣

對澤

在猗氏縣南二十里猗頓居牧處也今其地爲

王寮村水經注猗氏縣南對澤卽猗頓故居元
王思誠詩云對澤空城在桑泉故邑蕪

介推隱處

在萬泉縣東南十五里介山水經注云晉太康
記地道記與永初記並言子推逃隱是山余按
介推所隱者綿山也杜預曰在介休西河者是
也近世顧炎武亦辨爲當在綿山然自漢晉以
來謂子推逃此傳說已久矣

登仙石

在萬泉縣孤山南麓桃花洞側洞傍舊多桃故名舊傳仙人劉海蟾時踞此石後羽化於此石乃登仙之遺跡焉

楊妃村

在雷首山下獨頭坡唐貴妃楊氏本弘農人其父元琰家於蒲州之獨頭村貴妃生其間及入宮後因號其村爲貴妃村今獨頭坡正唐時村地

在永濟縣大門外左右對立高可四尺舊州志
云父老相傳帝王所行幸處臣民爲鑄金人以
示榮考唐王昌齡詩知爲元宗幸蒲時鑄者山
西通志謂河東故縣在西北隅宣化坊隋開皇
十六年析蒲坂置後并蒲坂入焉今改建按察
分司其前有鐵人二傳爲唐明皇幸此臣民鑄
以示榮今考明時蒲州治爲卽古河東縣之故
處至雍正六年改府州治卽爲永濟縣治未嘗
有按察分司之改其按察分司舊本在州治西

偏與二鐵人初不相及也又考唐渾瑊以咸寧
王鎮河中金人蓋當時所鑄以旌其功者非以
元宗故也

大中祥符金人

金人凡四宋真宗大中時所鑄以奉祀后土者
也舊在滎河縣城中宋御製祀汾陰二聖配享
碑前土人呼碑爲蕭牆故滎河舊志謂鐵人在
蕭牆前也人高各六尺云於祀時用爲頂焚爐
之具明晚時縣人以河水數漲懼爲患共言於

官云鐵人能壓水災因移西門外河側以鎮之
開元鐵牛

在郡城西郭外黃河坼上唐開元十二年所鑄
以維河橋者唐書志云於蒲津關兩河坼開東
西門各造鐵牛四及前後鐵柱三十六鐵山亦
四夾坼維舟河梁用成今視牛甚壯巨狀皆蹲
伏腹没入地尾後有大軸橫繒之軸首花紋模
製甚工牛人皆精澤照吐久爲偉觀也

宋政和鐘

在臨晉縣本鐘樓所懸前明隆慶辛未中尚存
亦數百年物也明知縣史邦直有記云擊之聞
三十里

河中名跡其見於古者多矣撫其山川吊其人
事溯流風而懷往躅倘亦增勝郡國暉麗不盡
者哉惜其遺景餘響或歲月之久歸於零落消
磨其處可指而識考而觀十不三四徒慨然於
眺悵也故並列其名貽夫入國而談曩烈者若
夫臨晉段雄之城欲附於干木猗氏八士之里

將假以周人與彼疊名佛骨石稱上馬斯則陋俗無取從刊斥焉

陵墓

女媧陵

舊在蒲州南六十里黃河洲渾上今風陵渡其遺處也水經注云潼關直北隔河有層阜巍然獨秀孤峙河陽世謂之風陵戴延之西征記所謂風埶者也九域記女媧墓在今潼關口河灘上屹然介立有木數株雖瀑漲不漂沒元和郡

縣志風陵堆在河東縣南五十里與潼關對寰
宇記云風陵城在其下閬鄉津去其縣三里卽
風陵故關也考古要錄河中風陵或疑爲古伏
羲塚以庖皇爲風姓故然女媧亦風姓或以爲
卽伏羲妹爲雲姓如羅泌所說者非也唐天寶
十三載天雨冥晦失陵所在至乾元二年河傍
風雷夜聲明旦視之墳復湧出夾以兩柳陝州
刺史奏之肅宗使祝史祀焉宋太祖乾德四年
詔置守陵五戶至熙寧中陵復失不見舊有唐

喬潭碑亦亡考城塚記云女媧墓有五此其一
矣

風后塚

今永濟縣風陵鄉焦盧里傳有古風后塚明萬
歷中蒲州守於其地立廟提學副使王三才爲
碑按古史雖言黃帝六相其一風后然其事皆
不可得詳環濟要畧言后爲黃帝侍中其僞妄
無足論黃帝之臣唯鬼臾區爲大鴻氏死葬於
雍故雍有鴻冢見太史公書若此之爲風后墓

者於傳無所徵夫安知其葬乎是古未之言反
能得之後世耶意者以其地有媧塚昔稱風陵
或不知其女媧遂謬當風后及觀三才碑則正
以風陵爲后證斯其失與俗同耳又若平陽府
志以風后爲解州人旣堪喁噉且言解州有上
古風后墓在州西南一百八十里芮城縣西趙
村風陵渡則仍指永濟所傳者尤非記載之法
也

在滎河縣北四十里百祥村隋制祀湯於汾陰
唐遷偃師宋太祖乾德四年詔置守陵五戶明
初禮官議古帝王陵寢湯陵在山西滎河縣正
德元年太常少卿喬宇疏湯王陵在滎河縣北
四十里舊傳陵已爲河水所壞不存歷代皆於
岍東近地設位而祭但屋宇卑隘地勢淺陋議
得廟後有隙地三四畝可以建置殿堂三間兩
廡牲房數楹從之後遂致祭於祠

古之記湯陵者凡三皇覽云湯塚在濟陰亳縣

北東郭去縣三里塚四方各十步高七尺上平括地志薄城北郭東三里平地有湯塚又云洛州偃師縣東六里有湯塚近桐宮括地志又云雍州三原縣有湯陵湯臺三原湯塚蓋西戎之君號亳王者可置勿論若薄城北郭則杜征南蒙縣西北有薄城中有湯塚所言與括地志同後漢郡國志又云梁國故闕伯墟虞有桐地有桐亭與蒙薄地至近然則湯塚在薄宜矣漢劉子政諫起昌陵歷指堯舜禹所藏至於湯則

以爲無葬處宋羅長源始疑其說然長源引聖
賢城塚記謂湯塚自後魏天賜中圯於河乃歎
子政於言不苟予尤恠長源之陋而闇於識也
夫子政之學無所不達假湯塚有在詎勿知者
且不獨子政昔墨子論節葬稱堯穀林舜南紀
禹會稽亦不及湯是可知湯之葬古失其傳昧
其地在戰國時已然而子政之云無處誠有由
然矣顧自魏晉以來謂湯塚或在濟陰或在蒙
薄或在偃師雖與子政不同特以湯所常都處

言之即不必果然庶幾於理猶近至隋文之世
乃獨祀湯於汾陰則傳記所勿聞前儒所未說
用其不經事誠大惑唐知其非故去汾陰而特
祀湯於偃師以爲湯遷於是也至宋不能守唐
之是而用隋之非還於汾陰更立祠廟後世因
之遂成故事習勿知考於是湯陵乃竟在此矣
予竊謂其必不然者有四旨焉昔堯之始國封
在唐及爲天子乃入都晉故後世唐縣唐山得
有堯跡若湯先世雖曰屢遷然相土居商邱上

甲居鄴而湯居亳史記言湯從先王居謂帝畧
都亳湯自商邱而亳故曰從先王卽後世言南
北景亳蓋有三要皆在河南未嘗畧及西河
之遠則跡所勿屆於陵何有是其不足信者一
也舜崩蒼梧禹崩會稽並以巡狩所至故今粵
西浙東得有二塚若殷湯無巡狩之文汾陰非
巡狩之地何有崩且葬乎是其不足信者二也
謂湯都垣曲乎故陵在是然觀周漢帝王並都
關中其所葬處皆在百里內遠不過二縣今自

垣曲至滎河且五百里而殷家尚質亦無有越
都畿而遠葬之事况垣曲又實非都乎而葬安
由至此是其不足信者三也自古天子巡狩所
經其地有先世帝王陵廟必告而祭焉故秦始
皇上會稽則祭大禹漢武帝至江南則望祀大
舜唐玄宗將東巡則遣宋璟魏知古蘇頌於平
陽祀堯蒲坂祀舜安邑祀禹汾陰之近也而不
及湯卽漢之武宣光武及唐明皇帝又常至汾
陰矣然祀終不及湯夫非知湯之不在是而無

用祀乎以此論之是其無足信者四也或曰汾
陰故有殷湯城使湯不於此城何以名則不知
汾陰之城魏文侯所築無與於湯括地志云汾
陰城俗名殷湯城以其稱之無稽故特謂之爲
俗名且古固多有以人姓名稱其城者若漢時
趙信所居卽呼爲趙信城蜀有張儀所築卽呼
爲張儀城又古多有姓名同於前代帝王聖賢
者如陳王博士孔甲則無殊夏后高祖功臣周
昌則直以姬文安知秦漢之世不有殷湯其人

者居此因以號其城乎而欲引以附於湯詎不
惑耶或又曰然則路史所引城塚記湯塚於後
魏時淪圯爲張恩燹之於河則果不足信歟曰
是正吾所欲辨者記言湯塚圯於後魏中夫使
塚果在是則未圯之先人應共知宜早著於世
何絕不聞必俟圯而後知其爲湯塚是說之悖
也記言塚銘二千年困於恩夫銘起後世湯時
無是且傳記所言不憑其子佳城鬱鬱皆以爲
銘出於壙則好詭尚異者僞爲之耳秦始皇欲

發孔子墓視銘而止亦出誕妄豈湯伊尹以聖人而同術者爲推測又說之悖也則常求之水經注矣以道元之好奇於事無不採况身當北魏之世使湯果有陵陵果圯明器果爲恩棄必詳記之乃其於皮氏汾陰不過曰耿祖乙而已鄧邱漢方澤而已介山而已睢邱而已絕無所爲湯塚者圯而燹者然後益知城塚記小說者流語盡荒唐而長源據之以議湯塚之久沒是其陋誠何如若乃舊志謂元癸未歲淪於河以

石柩遷葬東岍夫既言淪尚何有柩之可遷且
桓司馬爲石槨孔子言死欲速朽湯寧與桓司
馬同其侈哉而爲石柩乎是亦飾言湯塚之所
爲陋尤出於長源下者或以史記秦寧公三年
伐湯杜湯杜亦號亳王與秦戰不勝奔戎所謂
汾陰湯陵者疑卽湯杜亳王者是或又以湯之
子孫有封國者亦號爲湯是皆古所未詳特尋
皇覽所言與括地所志塚不在此亦甚明白惟
偃師薄城塚尚有二則猶其疑於此益歎子政

謂無葬處其學廣識達所論獨偉矣明初求帝
王陵寢禮官不能辨徒循宋元之跡而舉之其
尤失者至以宇文氏所立之元寶炬當北魏孝
文帝夫孝文初欲從其太后於永固陵後遷洛
陽乃自定壽陵於瀍西南伐道殂歸葬於是此
史籍所載可得稽考尚乃不知况湯陵也哉又
近世聞喜縣亦言有湯陵李汝寬頗辨其失其
言曰據劉向則湯陵所在不可知據尚書注雖
知桐爲湯陵而桐之所在不可知據文獻通考

及喬宇等所言雖直指滎河而猶未可盡信也
嗚呼若汝寬者庶其知言者歟

殷伯夷叔齊墓

在首陽山二賢祠內二塚並列有巨碑書古賢
人之墓塚上下四周大小古栢四十餘樹水經
注雷首山有夷齊廟一曰獨頭山夷齊所隱也
山南有古塚陵栢蔚然攢茂邱阜俗謂之夷齊
墓也診其景象今曩尚同矣

漢桓榮墓

舊志云在首陽山漢明帝時榮爲五更賜爵關
內侯及卒賜葬於此考榮所賜葬處在偃師西
北非此首陽也蓋以山名之偶同而誤引者

唐衛公李靖墓

唐葉公杜如晦墓

唐梁公房元齡墓

右三塚蒲州舊志載之不知三人皆陪葬昭陵
在今陝西醴泉縣此俱不得有之也考房彥謙
隋末爲涇陽令卒亂不得歸道葬於蒲則梁公

之父所謂元齡塚者當是彥謙耳其李靖者唐
文宗宰相李石居永樂所爲靖者疑其石耳如
晦則莫知誰何矣

唐裴府君墓

在首陽山之陽穆員撰志稱有唐君子河東府
君之墓

宋將軍李興墓

王安石爲志在永濟縣陶邑鄉

金田先生世英墓

在陶邑鄉

金孝子龐整墓

在永濟縣風陵鄉小李村舊志云墓前有勅賜

孝行碑記

元參政裴居敬墓

在陶邑鄉

明山陰康惠王墓

在永濟縣東北文學村

明襄垣恭簡王墓

在孟明橋北

明兵部尚書楊守禮墓

在永濟縣南

明吏部尚書太傅諡襄毅楊博墓

在永濟縣南王莊里

明兵部尚書太保諡襄毅王崇古墓

在縣東峨嵋原

明大學士諡文毅張四維墓

在縣南風陵鄉

明戶部尚書楊俊民墓

在縣南陳村

明大學士韓爌墓

在縣東盤底村

明殉節歷城知縣贈光祿少卿諡忠烈韓承宣墓

在永濟縣石家村

明殉節知府樊邦正墓

在永濟縣華園村

國朝戶部侍郎杜篤祐墓

在永濟縣南祁家庄

國朝布政使田厥茂墓

在萬固山下

上永濟縣

晉司空王卓墓

在臨晉縣東南二十里城西村

隋薛尚書道實墓

在縣北四十里平宜村北臨晉志云穹碑高峙

螭首龜趺八分字體大書深刻雖風雨剝落而

名爵宛然可識

隋黃門侍郎陳茂墓

在縣東北二十里小嶷山前碑字剥落石羊虎
尚存

唐裴尚書墓

在縣北五里聖壽寺側臨晉志云舊有鉅碑虞
世南文歐陽詢書因搨取不息土人瘞之

唐薛長府墓

在平宜村北古碑云名寶積道實之孫爲揚州
長史

唐司空侍郎墓

在縣南六十里王官谷下

宋都尉孫繼鄴墓

在縣南六十里南郭村臨晉志云有碑書端州

刺史兼御史大夫騎都尉

金張節度墓

在縣南三十里城子埕村西臨晉志云有碑名

繼祖金時狀元

金麻主事墓

在縣南六十里東吳閭村臨晉志云名秉彝有
王庭筠碑存其孫革墓附於側

金申孝子墓

在縣北三十里丁庄村臨晉志云號忠孝將軍
事不詳

元謝將軍墓

在縣北三十里有碑存

元樊孝子墓

在縣東六十里有碑存

明巡撫荊州土墓

在縣南二里

明兵部侍郎李棲鳳墓

在縣北十里

明殉難知縣贈按察司僉事姚昌祚墓

在縣北二里

臨晉志所書塚墓有古扁鵲有樊太守有霍榮
祖通志所載又有鄭司農玄臨晉令孔僖晉司
空張平子皆傳說淆訛無足取信其樊太守舊

云噲後名伉伉爲誅呂大將軍一名演演爲河

東太守北解侯雖王恭先亦辨其非以爲宜如

蒲州舊志以演爲唐時而非漢然唐固無河東

太守北解之官與地則辨之猶不能審至於鄭

玄之不稱司農孔僖之令非臨晉又曉然者今

並不著云

上臨
晉縣

古猗頓墓

在猗氏縣南王寮村

漢丞相翟方進墓

在縣西翟村猗氏志云順治十六年大水有碑
自墓中出碑爲唐長慶二年長孫儻撰云方進
兵敗子孫逃難西遷改葬於此

晉河東太守王毛墓

在西關外演武場西

唐丞相張嘉貞墓

在城外西北隅嘉貞延賞弘靖三世塚皆在焉

唐斬將軍墓

在縣內大清觀西北

金大將軍判河中府事南仲墓

元陳宣靖墓

二塚並在陳翟村

明副都御史何東序墓

在縣西十里陳范屯東

明甘肅巡撫荊州俊墓

在縣東五里

國朝貴州巡撫衛旣齊墓

在縣南

國朝江南學院邵嗣堯墓

在郭北五里

猗氏志縣北南景村明隆慶初嵯崩石出辨有
八士字因指爲周八士塚夫八士雖稱在魯論
然事無所見唯南宮适稍著於汲書今冀州南
宮縣爲适封國若是而已奚有於此哉如以石
有八士字而遂塚之已是大愚况所爲石字可
辨者其果信歟至於陳平鄧禹魏徵馬燧彼之

傳說徒誣古人耳故悉置不書

上猗氏縣

唐薛尚書墓

在萬泉縣烏蘇村萬泉志云有碑書大唐故尚書汾陰縣公薛君墓餘盡剥

唐韓國公薛平墓

在縣北薛村縣志云有碑記

宋御史裴瑾墓

在縣北二里碑文已剥其額云命官故右補闕

裴公神道

明都御史袁泰墓

在烏蘇村

明忠義黃連墓

在黃家庄

明孝子李軌墓

在大趙村

明節婦廉氏墓

在烏蘇村

明兵部尚書賈仁元墓

在張戶村有諭祭碑

萬泉志其載塚墓有錢鏐董永蓋非其實又有
皇甫嵩疑嵩之當爲遐也後周書皇甫遐汾陰
人以至孝稱爲當時所表塚宜屬之不然嵩安
定朝那人獻帝初拜爲太常病卒長安何爲葬

此哉

上萬泉縣

元吳元帥墓

在滎河縣薛稽庄縣志云元人名信今塚前碑
存字毀莫識

元韓元帥墓

在城北十里縣志云名通元末時守穆陵關

明蔡瑄墓

在城南三里洪武時官通政使

明廉吏周主事有光墓

在城東北二里有碑存

上榮河縣

榮河塚墓之有諸葛武侯張儀猶猗氏之八
士萬泉之錢鏗徒自惑耳不書爲愈也

隋洛州刺史趙昭公墓

在五老原西北三十一里御正大夫裴肅撰碑

唐許州刺史王得墓

在縣東石衛村碑剥

唐太傅董公墓

在縣東十六里董村太傅疑爲董晉晉本虞鄉人然權文公作神道碑稱晉葬河南縣萬安鄉則非晉矣但神道碑又言考伯良贈尚書左僕射則此太傅當屬伯良墓

唐監察御史趙煦墓

唐法曹參軍趙徵墓

唐贈太常卿趙叡冲墓兵部郎中邵說撰碑

唐中書舍人趙良器墓吏部郎中楊琯撰碑

唐贈揚州都督趙良弼墓顏真卿撰碑

唐贈吏部侍郎趙復墓賈至撰碑

上虞鄉縣

六墓並在五老原西北自隋洛州刺史下臨晉

舊志皆不載今依通志書之方修通志時虞鄉

初分縣見在亦不聞有諸墓通志蓋以虞鄉無

可載者特取古碑刻集目列爲觀美云

寺觀

萬固寺

在府東南十五里中條山麓唐大中八年建寺
因山爲高凡三重上有浮屠有泉出寺左行十
餘里爲人引溉寺最高處望黃河華岳皆見之
有石刻諸天像三十六列陷壁間像刊檀施姓
氏無畫者名故舊傳爲吳胄曹跡然非其真特
畫法亦精好可觀宋時程明道奉使至河中常
往遊有詩云白石萬固皆勝地舊又有東坡水
自石根流出風從松頂飄來石刻自餘明代遊

者詩石多存寺中

棲巖寺

在府東南二十五里中條山土北周建德中建
初名靈居後改焉隋文帝常以外國所貢瑪瑙
盞施寺爲供唐時名士多遊於此盧綸李益李
端並有詩傳於人間其餘吟咏尤衆棲巖爲河
中諸寺勝賞之最其上有讚歎寺山中多產藥
黃精尤盛僧每採藏之讚嘆寺今稱上棲巖有
隋棲巖道場舍利碑爲賀德仁書碑石已裂文

字尚完好可誦書頗似虞永興尤古拙又有宋
至道元年禁牒其傍刻杜諤薛佖題名有宋政
和碑一碑陰有安奐大字又有范純仁蔡延慶
等題名大書書類蘇黃法有後周顯德碑字亦
壯偉有金時碑一元至元大德碑二至元碑兩
面並刻文字有元謝吉等請欽長老住山石刻
四片陷壁間有達摩石刻像云是吳胄曹所畫
寺外石幢六已折其一幢皆刻梵經不知何人
書大要隋唐時也

普救寺

在郡城東六里唐時名西永清院五代時漢遣
郭威討李守貞於河中周歲城未下威召院僧
問之對曰將軍發善心城即克矣威折箭爲誓
翌日果破乃不戮一人因改院曰普救明初併
廣化旌勛藏海乾明四寺入焉寺有窰堵波合
磚成之於地擊石有聲若吠蛤蓋空谷應響類
矣

開元寺

在東關薰風巷東寺內舊有唐侍中渾瑊丞相
杜黃裳像後失之宋咸平四年楊億撰寺塔記
明洪武初併淨業善慶諸寺入焉

景福寺

在城南二十里六管山有明神宗御書額

下方寺

在城東南百里觀後村宋崇寧元年建

永樂純陽宮

在郡南一百二十里南張村唐呂巖故宅巖仙

去後因其宅爲道士觀元中統三年改號純陽
宮中有古栢及連理銀杏樹子傳巖手植金進
士袁從義碑存

通玄觀

在永濟縣南六十里九峰山下觀有明萬歷二
十七年賜道書經藏一部并明神宗皇帝賜勅
一道今並存勅曰朕惟道藏一書乃黃帝老子
以來諸高士名流玄言法語大較以清淨慈儉
爲宗朕自冲昧承嗣宏基迄今二十有七禩天

下和平臣民樂業實皆天眷祖德所致足徵靈
通妙應之機昔漢文帝嘗用其言庶幾庶富之
風所謂道之精以治身其緒餘以爲天下非其
驗歟厥後源流漸廣文字遂繁金簡丹書紛然
並出符錄科教沓爾嗣興其說在拔濟幽途祈
求福利雖曰多端要以作善降祥不善降殃感
應之理焉可誣也我祖宗設立道祿一司專領
是教聖母孝慈宣文明肅皇太后嘗命摹印全
經頒布天下朕旣序之簡端跋之篇末矣茲者

國靈遐邇蕩除海氛朕祇承天地祖宗之佑思
與四方休息歸於無爲念爾蠢蠢衆生知識各
別明罹罪罟幽負譴責一夫不獲是予之辜所
以首過雪愆祈恩請福朕實眷眷也爰命所司
印造全藏四百八十函施舍在京及天下名山
諸道觀用廣其傳凡爾羽流其焚香諷誦信受
奉行爲國祝釐爲民解罪潔嚴頂禮永遠尊藏
不許褻玩損失特賜護勅通知欽哉故諭

在城西南元至元四年建內有呂仙人瓜皮書
石刻存上永濟

藥師院

在縣東北甘泉坊唐天寶中建

延祚寺

在縣南七十里宮殿僧衆較諸寺最雄元至元

中建

觀音閣

縣南六十里石佛寺南地形高爽林栢叢茂一

方之勝

靈峰觀

縣南七十里五老山下本名無相隋開皇中更名遊仙唐貞觀中更名大明貞元中又更今名爲羅通微修道處今屬虞鄉

丹陽觀

在王官谷唐司空圖故隱今屬虞鄉

通真觀

在縣內東南隅元泰定中建呂仙人有詩

道清觀

在方山下唐侯道華昇仙處舊傳觀傍有硃砂洞以大石方二丈餘覆之石色皆赤內有一井水常滿道士言道華留記凡竹成林水自溢如是三次則觀中當復出一人飛舉云今屬虞鄉上臨晉

龍巖寺

在縣東十八里唐貞元二年建金星統五年修

仁壽寺

在城東北崑原之麓金貞元三年建中有浮屠
大佛閣隋曇延立講堂於此

雲巖寺

在李村寺舊有藏經三千卷明洪武初所賜今

殘缺

大清觀

在縣東南二十里金大定中建上猗氏

彌陀寺

在張戶村傳爲北魏景明中建爲僧寺最古者

法藏寺

在馮底村傳爲唐貞觀中尉遲敬德所修

正覺寺

在景村唐龍朔中建又有福興寺在西解村亦

傳唐時寺

大雄寺

在南解村宋至和中建又有黃龍寺及興龍勝

果檻泉寺並宋元祐宣和時所建

下生寺

在四望村金天興元年建內有龍栢傳爲漢光武繫馬樹今栢尚存西南一枝形似龍虬中有

光武祠

法雲寺

在介山絕頂弘麗甲於一方天將大雨雲起山巔寺藏其中元泰定元年建

崇寧觀

在西賈村上萬泉

八龍寺

在縣東十五里宋大中祥符間真宗祀汾陰至此見八龍垂像之瑞因建寺內有浮屠元至元中修

大覺寺

在縣北三十里傳爲唐垂拱初寺也

金山寺

在縣東峨嵋嶺宋熙寧七年建又縣東門外天寧寺亦建於宋紹聖中

廣福寺

在縣北三十里馮村金天會中建

觀音寺

在縣北四十里元至元二年建上榮河

雲峰寺

在縣西南十里方山唐咸通四年建宋雍熙三年僧奉祕修陳協用有記山上有塔明隆慶中爲雷所折今存其半

石佛寺

在縣西南三里卽古栢梯寺內有唐虞鄉令劉

行忠幡竿銘石存

延祚寺

在縣西北十五里唐貞觀中建傳宋太祖微時
嘗於此及方山避難百日太平興國二年勅修
二寺明嘉靖乙卯寺爲地震所傾萬歷二十五
年修復焉山陰王朱俊柵爲記崇禎十一年復
修山陰宗室朱廷理端居道人立石

紫栢禪院

在縣東南十五里王官谷東金大定三年建上

虞鄉

夫塚墓之志以存其人雖千載眇往而墟壟如在尚將徘徊弔之昔人是以嘆可作於九京矣雖然聲華不沒用爲景行表式所留亦唯賢哲若乃柳下抔土秦將從而却兵信陵遺封沛公過而酌酒斯其可貴簡牘宜收次亦銘類長威示滕公之宅君同冥漠啟惠連之文事或堪談用留緜邈不然古今一邱貉耳簫鼓以入松楸麒麟以壯華表賜祕器而錮三泉者亦復何限

名之無立跡已隨淪固非陳留風俗所傳抑詎
足煩李彤之記乎至如羽人樓觀開士仙陀伽
藍稱乎洛陽館壇標乎長史書之自昔此亦宜
然要唯著勝當年肇營歲古取其靈奧境有可
傳次而籍之亦不多述也

神戶府志

卷之三

吳

風俗

隋書河東西河其土地沃少瘠多是以傷於儉嗇其俗剛強亦風氣然

州舊志民姓質樸好尚節儉力田紡績尤尚商賈

祝氏志州人儀容閒雅服飾鮮麗仕宦之鄉人文稱

盛

祝氏臨晉志男女盡職士喜節義近多好訟婚姻論財

臨晉志土剛而燥其人負氣好鬪至男業耕耘士子

不廢女勤績紡巨室亦然

祝氏猗氏志民務農桑士嗜文學

猗氏志秀者爲士樸者爲農士不廢耕耘而農瞿瞿
蹶蹶終歲靡寧卽欲不儉孰與爲奢

萬泉志地僻邑小無故家巨室以變其俗無通商大
賈以廣其業無明師通儒以嚴其趣其士以耕讀
爲務以氣自高質直無詭險其小人性悍使氣不
善變通然淳樸畏上盡力南畝

祝氏滎河志務農少商好神健訟

劉尚質記勤勞稼穡不敢奢侈唯務節儉
通志虞鄉地稱膏壤民亦勤謹畏法

滎河志邑素樸古邇來服飾燕會漸以趨侈至如強
凌弱衆暴寡健訟頑嚚又甚於初示儉示禮伊誰
責也

州舊志按詩傳其地狹隘而民貧俗儉唐魏遺風讀
詩者實切向往但勤儉貞良與驕奢淫佚習俗移
人時有遷流賴主持風化者維挽運會則人心古
而淳風千載存矣

論者皆言蒲爲舜都與唐魏之舊蓋有其遺風
自予觀之河東之俗亦屢變焉後漢志引博物
記謂地有山澤近鹽漢興少名人大衣冠其衰
絕者至於三世及隋文幸蒲州又歎其冠冕儀
度稱由仕宦者衆陶染成俗唐之中世頗多文
儒金元兩朝郡望歇寂夫自漢而下風會遷流
浸以代易况堯舜之遠哉顧其所云唐魏勤儉
者至今尚爭引爲美談夫山樞葛生蟋蟀皆唐
之風班固明其思奢儉之中死生之慮而十畝

之間伐檀河干蓋潔清寡營寬閒自得故吳札
聞歌魏則稱颯颯焉郡俗以勤儉聞者久矣然
其所爲勤者或逐刀錐於末富而力不盡乎田
蠶計不知乎樹畜幸歲一獲則婦子飽食而嬉
丈夫負柱而息所爲儉者貧富之隔秦越視其
親戚者有焉錙銖之較財賄重於性命者有焉
至乃千金之子躬田耜而不休封君之家同後
門以自蔽作勞不顧其迫處已莫知其餘是較
葛屨女手所深刻爲瘡甚者也夫勤儉之失皆

有其敝勤之敝也歸於褊急儉之敝也成爲嗇
陋魏之變風作於衰周之世蓋至是堯舜忠厚
久無在者卽其初憂深思遠勤儉之舊亦盡失
焉獨縫裳履霜所遺餘者若至今存豈其山川
風氣區限成於自然雖千載綿邈而終莫改歟
舊志又稱土燥氣剛人性多悍好鬪喜訟驚黠
兼有或樸僊不知通變則西北習俗大抵若然
不獨在蒲矣夫風俗推遷與化移易椎髻懷磚
或興禮讓觀漢時河東人物幾絕至乎隋世仕

宦復多則知運會有盛衰澆淳可代易矣誠使
教以明之事以示之優游漸漬裕以歲月息鬪
訟而歸馴化閭閻而使達去其褊急陋嗇以守
勤儉之中革其躁戾囂凌而敦忠之本復古唐
魏或庶幾乎

物產

因土之宜而制其物貢蓋陰陽德產聖人材之導民
利用使資焉不窮於是業其所利民無棄功物得其
任矣蒲濱大河土性厚博蘊氣鍾潤生殖宜衆然問
諸山藪之藏林虞之掌幾無有焉豈地所效於茲獨
寡歟予讀唐史蒲州河東郡歲輸貢京師其用物則
有氈翅扇其藥物則有龍骨其果蔬則有棗有梨梨
曰鳳棲又其常貢有綾絹扇亦見於他書至宋時州
唯貢龍骨五味藥二品而已明時所定則有羊五十

六有藥藥無定品以觔計者百四十六有葡萄腊腊以觔計者五千四百特估其直徵金代之夫非以寡所出存其名而不責難致者歟且河東古有蠶桑今之州戶希聞功繭冀州本宜畜擾今之氓俗不考維羣是以西北多僣皮裘晉絳工爲毳罽澤潞織作貨出國中求之於蒲畧無其一然則產陋不贏非唯種土蓋人事計拙亦居其半焉舊諸縣志所載蔬穀草木毛介禽虫狼藉紛陳徒爾無取今錄其資於用稱乎人稍可記者欲知蒲之產觀此足矣

木棉

種自河南至甚久晉省諸郡皆有之唯永樂所出
獨多性宜沙土疏而易達永樂人藝者於河壩不
計頃畝歲無霖潦及河水所敗則大收縕絮禦冬
及供織紡賴其用焉

棉布

縣並爲布其邊幅視常加寬然有疏理者密緻者
出滎河者特勝製爲衣耐久服也

蒲紙

以麻爲之雖敝絮苴履砍剉之亦可取雜投其中
漚漬久之俟敗盡漸膚合水面揭之成紙以供飾
墻壁及裹藉諸物用歲造十萬送京師納於戶部
有司領之

蒲筆

蒲人製筆舊云皆免翰近多以黃鼠擇其毫漂合
作之雖不及湖州所造然佳者亦中書視東坡雞
毛筆頗相類也

柿爲蒲人利如古所爲木奴者矣其植多者千樹
少猶數百株霜隕而熟落實以待販旁致數郡柿
有小而圓者種倍甘頰鮮若火珠雍正初常入貢
後罷之凡柿藏者經冬不敗貧家日或買數蒂柿
嚼餅數片不復炊釜故蒲人云柿可禦饑年其樹
歲久者膚皆方寸坼然甚堅其材無所用供薪而
已秋時葉盡絳耀照霞景尤可愛玩或云其樹鳥
雀不敢棲也

虞梨

梨自虞鄉出故以字焉虞鄉種梨者雖多不及蒲
柿人亦收其利大者如升重或至觔餘疑其鳳棲
遺種矣剖槧梨木爲貴以堅能久不漫也

竹筍

山西無竹而蒲獨有竹地稍近西南冬候微和故
蔣得長焉然竹無大者渭濱千畝多亦殊遜惟風
枝雨葉瀟灑數叢欣見此君夏乃抽萌亦甚細但
勝荻芽耳以晉中僅有故記之其外卉植有緗梅
河中前世酒特擅名楊銜酈元並記芳酌隋時置

官唐年設監汲河而釀稱爲故事宋禁中造酒方
取蒲州明代王尚書元美尚及品其清冽今業酒
者以柿爲之甘芬盡變無復可嘗又昔所云五味
龍骨諸藥物出此州者亦絕不聞夫蒲之人物與
其風會盛於前而視今不如昔盈虛消息之間卽
小可以喻大也

蒲州府志

卷之三

三

蒲州府志卷之四

城池

蒲州府城

永濟縣附郭

郡城舊爲州城平陽府志謂卽虞都舊城通志因之
蓋傳說之誤而未嘗考其始築在元魏之世魏置
河東郡治蒲阪又改秦州行臺在焉周隋因之至
唐爲河中節度軍使鎮城安祿山將崔乾祐及李
懷光所據郭子儀所取馬燧渾瑊所攻並是此城

五代漢李守貞反河中使郭威討之威曰城臨大河樓堞完固未可易尅千載已遠形勢猶是舊城所築其周幾二十里金哀宗正大八年元兵攻河中府金將草火訛可以兵少力不能守乃截其半爲內城以守周八里三百四十九步則今城是矣或以城爲李守貞反時所斷非也自訛可時城多殘破元代葺之元至正十年宣慰使賽因赤答忽懷遠與守禦宣撫同知危國英增修明洪武四年千戶張蓋重築用輓裹堞城高三丈八尺堞高七

尺門四東曰迎熙南曰首陽西曰蒲津北曰振威
上各建樓一樓皆三重觀甚壯其樓東曰景虞西
曰鳳儀南曰卿雲北曰鑑光又設角樓四敵臺七
土庫五窩舖五十七門外各建月城西臨黃河東
南北三面池深一丈五尺濶十丈環六里四十五
步嘉靖三十四年地震城壞河東道趙祖元知州
邊像重修隆慶元年河東道歐陽穀知州宋訓復
加甃甃至康熙元年癸卯知州侯康民重修賽因
赤答忽懷遠之修也鍾廸爲之記邊像之修也尚

書盧申爲之記而康民則自爲記舊志皆載之

東關城舊志以爲卽金時所截之餘明嘉靖二十年河東道郭時叙知州趙統重建三十四年地震盡圯知州邊像復築之有東南北三門其西與治城接上各建樓崇禎九年知州王樺徵亦加甃甃至康熙元年秋霖積旬關城與州城垣摧圯幾半知州侯康民因修州城并關城並新葺焉

明苟汝安重修東關古城記云正德初流賊自

豫入晉太守金陵殷侯創古城則在趙統之先
已有爲之者舊志載殷鏃丹陽人正德六年任
自正德六年距嘉靖十九年已三十載豈鏃所
創至是復毀或爲功勿就待時叙與統始竟其
績耶舊志河東道無郭時叙名而汝安記又不
及趙統唯稱平陽衛經歷王世卿任其事則其
所述之不同者

前志稱舊城幾大二十里爲金將所截今東關
卽截之餘考金元之際金河中屢爲元破旋亦

復守而元卒取之金侯小叔守河中爲元石天
應襲有其城小叔自樂里砦夜攻天應坎城以
登雖還奪河中而城郭已半壞至明年元仍攻
破之益就殘毀草火訛可在小叔後其時旣以
兵寡力弱恐亦但因所毀破者補築以拒元而
全城之規模不能復立未必果盡出於截棄也
且旣稱舊城幾二十里訛可截爲內城周八里
三百四十七步則所截之外尚應得半今東關
城地視郡郭不當三之一是所謂幾二十里者

亦非其準而截半爲內城亦傳說之難定也其
八里三百四十七步者明知州邊像修築時規
數如此見於盧申之記遂欲舉以附於訛可恐
非翔實之徵矣嗚呼河中古爲大藩重鎮其城
郭素號壯峻而完固唐宋之盛不得見已卽明
中世州萃而居者巷陌常滿旣多仕宦甲宅連
雲樓臺崔巍高接睥睨南郭以外別墅幽營貴
家池館綺帶霞映關城所聚貨別隊分百賈駢
轅河東諸郡此爲其最今則飛薨蕩於朝烟列

第銷乎蔓草郭中計戶不及千餘礫石盈於道
周田犁半入城闕比於鮑照所賦可爲顧之而
興喟者也昔之昌饒殷樂其盛者若彼今之疎
蕪替瘁又如此豈地脉會有衰盛而運數時亦
乘之爲轉移哉夫古良吏所至能使戶版日增
興富致業州郡充實化陋就豐鬱鬱闐闐都市
盈溢太守竊有意焉而特媿其無術也城自侯
牧康民後久無繕者多就頽圯今方議葺之然
功鉅費重以俟上憲定其指畫而後從事焉予

常周覽其垣墻堵堞其築土廣厚而中甚堅故
自康民迄今已九十年雖缺裂崩落猶能久自
錚拄蓋前時之人興庸立事不顧客財費爲久
長計是以其效可睹與夫苟且之謀異也

臨晉縣城

臨晉城北枕峨嵋岡縣志稱唐天寶二年所築周三
里二百三步高二丈八尺址廣一丈濠深一丈其
東門曰泰和西曰慶豐南曰中條北曰峨嵋明隆
慶二年知縣黃茂易堞以甃三年知縣史邦直拓

岼濬濠南有甕城明萬歷中知縣高惟岡以形家
言開新南門而塞其舊廢瓮城崇禎十四年知縣
閔自寅加修重築南城樓 國朝順治十三年知
縣孫宗元增葺之而改其門額東邇陽西福潤南
拱條北迎恩康熙二十七年知縣徐煜開舊南門
塞其新者至四十六年知縣徐忻開新南門而舊
者復塞焉

明史邦直鐘樓記云邑城坐峨嵋坡下每歲夏

秋雨多漲作自城以北濤波雷鳴直抵北門城

垣民舍多致傾毀余議將四城門止存東西南
而塞其北臨晉志曰峨嵋原下西北之水自聖
壽寺側而下繞城之右直北之水自文星臺而
東下逕城北卧牛堤折而繞城之左每夏月暴
雨驟發先是明時城西北有開渠以行水者其
後久塞兩水奔流夾城鳴吼乾隆十四年坡水
大發直趨城下官署民舍皆漂潰城垣崩倒者
數十丈近郭村庄汪洋一片至旬餘始退明年
知縣周遐齡以西北之水滙歸長溝注射北門

爲害最大乃相度形便於近郭齊家庄買民地
開渠九十丈築堤障水導之東流西關以外於
胡家庄西依舊渠形迹濬令深濶引水南流以
備洪潦保邑郭云

萬泉縣城

城在山上本古薛通城也晉時汾陰人薛强當慕
容之亂築塢自固時稱薛强壁至北魏世赫連勃
勃寇河東强之宗人薛通因强舊壁更築城以拒
勃勃據託高阜南依孤山二澗夾流其勢峻險後

因名薛通城唐武德三年既置萬泉縣卽仍通築
爲縣城加恢拓焉周五里十三步元至元十四年
皇甫祐奏築新城古城漸廢明景泰元年縣丞常
英成化二年知縣崔明弘治十一年主簿龐俊相
繼葺高二丈五尺四門正德初知縣張席珍建樓
於上新城較古城稍下就曠無險可恃隆慶三年
知縣李廷棟重修古城城高如舊制堞甃以甃加
高五尺許厚一丈有奇復重建四門樓賈仁元爲
之記崇禎末流賊燬西門樓城亦多圯 國朝順

治十八年知縣鄭章重建西門樓自爲之記康熙三十四年地震城圯知縣瞿亮邦修焉

鄭章萬泉修城記云孤山特出層岡複坡纍纍下垂至山麓忽陡而窪隔數十百武復挺一邱東南西崕壁峻峭惟北稍平夷其傍爲東西二澗壑澤阻深城之址則因其勢鏹削而爲之施以版築上作睥睨三尺許有如天成

城內少井有掘地極深終不得泉者惟恃二澗故以汲飲爲艱又城中街衢隘窄且欹傾不平

度地居民非其便矣

猗氏縣城

猗氏城舊傳唐興元元年節度使馬燧討李懷光於河中築壘以屯兵後遂加築爲縣郭明景泰初知縣徐善重修周七里七十步高二丈池深二丈一尺濶三丈門四角樓四敵樓十六窩舖六十四正德中知縣翟聰修隆慶二年知縣江濶易堞以甃名其門東曰朝京南曰近薰西曰通泰北曰拱極萬歷十四年知縣陳經濟建門樓四十八年知縣

黃道見濬池築圍牆崇禎五年邑人荆可棟倡衆
增修築四門月城知縣李昌齡記其事 國朝康
熙二年知縣楊乾晉重修角樓及東西城門樓

榮河縣城

隋文帝開皇初築元至正十四年主簿邢天傑修周
九里八步池深一丈五尺東南北三門明景泰初
知縣于縉修成化中知縣馬懋加修正德二年河
水敗西北隅知縣宋緯補築嘉靖二十七年知縣
楊灝置東西女牆三十四年地震城圯知縣侯祁

重築易堞以甃增三門樓南北各建重門一萬歷
七年知縣郝朝臣開城西門八年知縣沈名實塞
之二十九年知縣梅煥復開崇禎十二年知縣王
心正別築西城於西門內棄舊城於外 國朝康
熙元年知縣張錫文重修四十六年知縣梅夢紱
繼修

滎河志云城東倚峨嵋坡土堅厚西逼黃河土
雜沙礮故城東高西低西門近河礮濕城易崩
頽也

虞鄉縣城

唐武德元年更虞鄉爲解縣於解西五十里別築城
置虞鄉縣元至元三年省入臨晉廢爲鎮 國朝
雍正八年復設虞鄉縣卽虞鄉鎮舊址築縣城城
高二丈二尺周四里池深一丈門四城樓四其始
築者縣令劉培元也

壇廟

社稷壇

在城北門外平濟廂明洪武三年知州事徐政
所建壇東西南北各廣二丈五尺高三尺四出
陛各三級壇下前開九丈五尺東西南各五丈
周垣繚之

風雲雷雨山川壇

知州事徐政同時所建規制視社稷壇

先農壇

國朝雍正三年勅天下郡縣各建先農壇頒壇制并祀先農及有司耕籍典式雍正四年知州龔廷颺奉禮部行文於東大城門外二里建設如制

郡厲壇

在城北門外復安里明知州事徐政建

明洪武八年定制令每里立社耆老主之歲春秋祀土穀之神每里立鄉厲壇以祀無祀鬼神州舊共八十七壇久廢

岳瀆貴祠

汾陰后土祠

古后土祠在滎河縣北十里其地即昔所爲雕
上者也始自漢文帝後元年治廟未定武帝元
狩二年乃立祠焉武帝自元鼎三年冬躬祀汾
陰其後元封四年六年凡三祀太初元年二年
再祀天漢元年一祀宣帝神爵元年五鳳三年
甘露二年凡三祀元帝初元永光建昭中三祀
成帝永始元延綏和中凡四祀東漢光武建武

中一祀唐開元中凡三祀漢時廟制不可得詳
至開元修廟規模壯麗同於王居號奉祇宮宋
開寶九年徙廟稍南遣官致祀宋真宗大中祥
符四年親幸汾陰告祀先一年修祠倍益增麗
後金章宗元世祖並遣官致祭其祠莊嚴弘鉅
爲海內祠廟之冠自元已前並葺於官明世始
屬民修焉萬歷之末汾水護堤傾剝汾隄漸陷
初祠前有秋風樓擁勢華煥元時刻漢武帝秋
風辭於石貯樓之下賦咏尤衆 國朝順治十

二年黃河水決古后土祠爲所淪蕩秋風樓及
門殿存焉康熙元年河再決并沒秋風樓於是
雕上舊跡泯矣今后土廟蓋是歲河決後榮河
令張錫文以爲不可無設乃創新祠未及成而
去明年縣令陳覲聖爲繼成之在舊祠前村北
是爲汾陰新祠

河瀆神祠

在城南門外漢制祀河於馮翊唐初祠於同州
開元十五年始自朝邑徙祀於河中府唐肅宗

封靈源公其有廟之始則河中節度使郭子儀
所建節度巡官王延昌記焉宋制以立秋日祀
河瀆於河中府開寶九年命守官修河瀆祠真
宗加號顯聖靈源公及祀汾陰遣官祭河瀆用
太牢汾陰還至河中親謁奠河瀆廟金章宗時
令州官葺河瀆祠廟元以立秋日祭河瀆廟如
宋故事至元時加封靈源弘濟王至正七年又
加號神佑二字遣官修祠勅學士李好文爲碑
紀事至明正統中知州張惟清請於朝而葺焉

御史謝琚記隆慶庚午山西撫按等上章請修
大學士張四維記天啟中復修尚書孟時芳記
國朝康熙四十二年

聖祖御書砥柱河津榜懸廟殿守臣勒

宸翰於石焉

御碑亭貯殿前雍正初廟貌復新

元李好文西海河瀆廟記云至正七年河決東
明白茅口浸山東諸郡天子憂之遣工部尚書
彌爾馬合謀等視河至河中又遣平章韓嘉訥

等禱祠下還並言河海二廟規制陜小歲月久
遠黜陟漫滅不稱懷柔以嚴祀事乃命中書
出楮幣緡二十五萬四千有奇興役於九年正
月落成於十一年十月總爲楹二百九十有四
其制畧擬王居明謝琚記云河瀆廟元季兵燹
煨燼殆盡洪武二年知州徐政權營小室一楹
以承祭祀幾八十年及知州事張侯到官睹其
勿稱請於朝大加增葺正殿五楹正門如之寢
殿殺正殿楹之二自正門入左右迴廊各三十

六總爲楹九十有奇孟時芳記云嘉靖乙卯地
大震河海廟崩久無復者隆慶庚午河水漲怒
衝射郊郭衆情皇皇咸謂神廟不治故於是巡
方使者合詞以聞詔議修復至萬歷甲戌而廟
成詳鄉先達張文毅公之記旣歷三紀浸淫頽
毀於是中丞郭君方里居慨然倡衆葺治復新
夫河祠自唐以來幾近千載其壞廢於累朝兵
革喪亂之間者屢矣故撮此三碑畧記其說使
後得考見梗概如此

西海神祠

在城南門外河瀆廟右元至元十二年勅建西
海神廟於河中此廟之始也祭祀儀幣一如河
瀆至元二十八年加號廣潤通靈王明隆慶庚
午天啟丁卯並修 國朝康熙四十二年

聖祖御書源遠流長勝懸廟殿守臣勒石構亭以貯
如河瀆廟雍正初與河祠並新

風伯雨師廟

在萬泉縣孤山栢林峯之顛祠下有崑崙臺傳

爲漢時所建漢光武登臺致祀因立此祠事雖
未盡信亦古祠也金太和七年修元大德壬寅
地震廟獨完鄉人擴而大之云旱禱必應至大
二年縣尹毛鐸爲碑刻焉

帝王之祠

大舜廟

在城東門外明教廂路史云後周蒲州總管大
宰宇文護之所建也考皇甫士安以爲蒲阪舜
所都城中有廟則已在護之先或護因其舊而

爲之宋太祖乾德元年詔河中府舜廟以臯陶配每三年仲春月行享牲以太牢真宗祥符四年祀后土前七日遣官祀河中府舜廟及上至河中躬謁舜廟命知府事者修飾廟垣親爲贊改舜泉坊爲廣孝坊元致和元年禮部議舜禹之廟合依堯祠故事每春秋仲月上旬卜日有司蠲潔致祭官給祭物明世亦命有司春秋祭其修廟者金大定元年道士郭道真明正統十二年知州張廉嘉靖三十八年知州邊像萬歷

二年三十五年知州陳以朝分守道喬學詩崇禎十一年修者爲守道吳阿衡知州王樺徵等國朝修者順治十七年知州馬翰如

大禹廟

在城西門外黃河坼上元至大三年建明正統十二年知州張廉修萬歷三十九年署學正施堯心知州程志以祀典久缺申請春秋崇祀

湯廟

在滎河縣東北十里湯陵上考隋始祀湯於汾

陰然未有廟廟則宋初時所建侍御史李瑩有
碑焉廟肖商湯像以伊尹仲虺配明正德初少
卿喬宇奉命告祭上疏增修祠宇 國朝祀典
仍之

古聖賢祠

風后廟

在永濟縣南永樂鎮或云廟下有風后塚其建
始不詳何時明萬歷三十八年知州張羽翔拓
廟址重營祠宇

后稷廟

在萬泉縣西薛里其建始亦不詳何時舊志云
金崇慶初知縣柳伋明正德中知縣張席珍祈
雨於祠皆應禱也

二賢祠

伯夷叔齊廟也在永濟縣南五十里首陽山麓
傳爲晉太康中所立然考前漢地志有首山祠
疑卽祠夷齊者水經注稱雷首山有夷齊廟則
其來已甚古矣明成化初僉事胡謐請於朝歲

祀焉二十三年御史張泰守道王存禮葺廟樹
二坊祠中多古栢有圍一丈五六尺者不知其
年歲有顏魯公碑韓吏部頌梁昇卿八分書及
丁約立石凡唐碑四慶歷六年黃載碑元祐六
年黃庭堅碑司馬溫公詩石凡宋碑五又有劉
永言書宋知府蔣堂首陽賦石金元碑四金爲
泰和四年河東縣令王文蔚元爲至元十八年
封二賢勅知府楊居寬修祠記與元貞元年小
碑一並存

名賢高士祠

介子推祠

在萬泉縣孤山之上

段干木祠

在永濟縣南百二十里上方段村元河漕轉運使段禧記稱是邑民聚里居名段者二故以上下別之皆干木之舊隱也上段有祠在其南唐大歷間段咸禧者剏之金末燬於兵有段福者繼修焉今其村多段氏自云並干木之後禧作

記亦謂乃其裔云

司空侍郎祠

在虞鄉縣王官谷唐司空圖退居處宋至和中
虞鄉令樂沆爲立祠肖像於中題曰表聖影堂
今廢沒久矣

田先生祠

金田世英祠也在城北復安里

曹學正祠

祀蒲州學正曹端在明倫堂西學者稱端爲月

川先生先爲霍州學正後補官於蒲及卒蒲與
霍並祀之

封國之祠

郇伯廟

在猗氏縣治東北

晉文公廟

在臨晉縣北三十里

名臣功德之祠

漢前將軍廟

其廟特多不煩徧書
惟著其祀祭所在者

在城東門內其址則明襄垣王廢邸也順治十五年河東道馮嘉會建

高密侯廟

在猗氏縣上李村舊傳高密侯鄧禹駐兵峨嵋坡今其地有神羗堡云是故處

唐李衛公廟

在永樂縣南東張砦

唐薛萬徹廟

在萬泉縣烏亭村傳爲宋至和七年所建

唐魏鄭公祠

在永濟縣任陽村

唐北平莊武王廟

在臨晉縣樊橋驛唐貞元間北平王馬燧討李懷光駐兵於此又元大德八年建馬侍中祠在縣東南十五里猗氏縣北門內亦有北平祠

明尚書楊襄毅公祠

在城北祀虞坡楊公博

明尚書王襄毅公祠

在鼓樓北街祀鑑川王公崇古

春秋祈報之祠

郡城隍廟

在通化坊明洪武三年知州徐政建成化十一年嘉靖三十七年萬歷十一年知州蔣容邊像鄭文樵並修順治十年知州周夢熊重修

八蜡廟

在城東郭外

龍祠

在永濟縣姚溫村其地負山踞勝邑人於廟前
後引水爲池築亭植樹里人遇歲旱禱雨有應
舊志云歷二百餘年矣

忠孝之祠

雙節祠

元世祀死河中難臣八扎海牙靳克忠久沒無
跡

旌忠祠

在萬泉縣學東明正德中建祀死賊主簿贈大

興知縣黃連

劉孝子祠

在永濟縣東郊外祀明孝子劉旭

禡禱之祠

旗纛廟

在城西北敬信坊明洪武十二年千戶張蓋建

馬祖廟

在城西門內

后妃列女之祠

娥皇女英祠

在歷山村中卽舜廟舊志建始莫考然觀宣室志所記則自唐有之金大定初重修

孟烈孝祠

在城東門內祠孟端妻邵氏

雜神祠

扁鵲祠

在小東門內

方山祠

在虞鄉方山

忠孝將軍祠

在臨晉丁莊村不知所祀

五仙人祠

在虞鄉五老峰下

文昌閣

在城東郊五里峨嵋原中岡上明成化中建初
州人楊僉事瞻欲卜藏室於此術者言此爲蒲
中風水第一主科甲仕宦最多瞻曰吾家何以

當此願公之州人因建閣其上論者比於范希文讓宅爲學宮以美之

夫廟祀之設所以崇德報功顯忠褒烈而已是唯捍災禦患澤施生民樹植名教者宜血食焉後世教化不明法制不立昧於祭法叢思日興瀆俎豆以亂人鬼之序者甚矣昔諸葛武鄉侯既卒蜀人家私祀之後主禁不許夫以武侯之賢與其功人宜有祀後主猶不許者彼於武侯寧有所恡特以制在而禮不可也予尋諸志淫

祠頗存二郎之屬既已非經猗頓之徒復何足
論知夫俗之多惑而作者之妄也今所志祠廟
條而區之其名跡之古而不戾於正者錄之

解署

蒲州府署

蒲初爲州明洪武三年知州事徐政建公衙聽政之署在城西北隅 本朝雍正六年州改爲府設附郭之縣曰永濟是時知府未有署即居州署而永濟令僦民舍以視事焉至明年議建府署於是知府劉登庸領金於山西布政司營署郡城隍廟左自州署遷焉乾隆十八年知府周景柱以其處曠濶少居人不稱理所乃告上官改城東貢士院

爲署署外列柵如兩轅自大門儀門入甬道屬堂
階下由大堂而入爲二堂東西吏舍分列二堂左
右各有屋爲客廳幕舍最後知府宅焉

永樂同知署

署在永樂鎮雍正十年新設同知章偉於布政司
領七百五十金卽唐永樂縣故址建署共五十有
八楹偉自爲記

府經歷署

在永濟縣後卽蒲州州判署爲之

府庫在大堂右

府倉在署右西街

官廳在署左故千戶廢宅也

郡鐘樓

在城南隅明遠坊明洪武五年同知馬驥建

郡鼓樓

舊在州衙前明隆慶元年知州宋訓移建於城中

二樓規制舊皆宏麗高壯分置鐘鼓以司昏曉云

永濟縣署

卽舊州署也蒲州知府初居焉後自有署以州衙
爲永濟知縣公署或曰州署卽元時河中府治明
洪武初徐政復營之正統知州張廉成化知州許
鵬皆增修 國朝順治元年爲兵所毀康熙十年
知州李雄飛重建

典史署

在縣署東北卽舊州同宅爲之

縣廣盈庫在大堂東

縣倉在大門內東南

縣獄在大門內西偏

風陵巡檢司在風陵渡洪武四年建本隸陝西雍正中改屬永濟乾隆四年仍歸陝西并移署潼關永樂巡檢司在永樂鎮洪武四年建今久廢

河東驛舊在南門外永豐廂後毀

稅課局舊在東門外仁義廂久廢

官亭舊在東門外明時知州事者築以待輜軒之使久廢

分守河東兵備道署

在永濟縣東偏明洪武三年知州徐政建舊制大門門樓三楹儀門三楹正堂五楹東西序吏舍廂房各三楹後堂內堂各五楹東西廂書房卷房庖廬咸具西北又有省察亭三楹大門外東西分列官廳有榜廊十二間嘉靖三十四年地震盡圯知州王文元邊像重建然規模視先不及 國朝順治中守道薛陳偉增葺康熙二年守道移駐平陽改署爲協鎮府十一年仍以河東道駐蒲州復改協鎮府爲守道衙門四十四年副使葉九思重修

州舊志云河東道明初止駐太原時出行部而
已其後改駐襄陵尋而遷蒲後還襄陵又改駐
於解後始定於蒲州駐節今移平陽志所爲今
卽康熙二年時也

提督學政行署

在今府署西南卽舊府署也府署移於貢院乃以
其地爲試士之院以俟學使者臨按焉

蒲州副將署

在河東道署東卽舊遊擊署爲之

中軍都司署在協署東明鎮撫司舊署爲之

守備署在協署東明守禦千戶故宅

諸舊署附

清軍同知署在城東平陽府志云即古河東縣舊
治昫自隋時明洪武二十八年改建察院行署
其後知州邊像再建 國朝康熙二十九年以
平陽同知移駐蒲州因即爲署同知劉民瞻修
及後設府同知還平陽署改貢院

舊按察分司在今縣治西偏

舊中分司在按察分司東

舊府館在中分司南並久毀

臨晉縣署

署在城中元大德中建明洪武四年知縣郭或

修弘治四年堂焚知縣王鑑重建嘉靖乙卯地

震圯知縣李世藩再建隆慶中史邦直增修

國朝康熙中知縣齊以治徐煜王光臯潘鵬相

繼修

樊橋驛舊在樊橋鎮今移城東關

萬泉縣署

署在城中齊禮坊街東元至元十六年邑令皇甫祐建明洪武九年知縣汪德峻修入 國朝知縣鄭章瞿邦亮修

猗氏縣署

署在城西元大德間縣尹閻璧建尋燬焉明洪武二年重建弘治十一年知縣徐誼修後地震圯嘉靖知縣韓應春再建 國朝康熙五十八年知縣錢甫生修

榮河縣署

署在縣城宣化坊元至正十一年主簿邢天傑
建明時縣丞馬復禮修後知縣高騰侯祁梅煥
等繼葺 國朝知縣張錫文陳覲聖李九疇屢
復增建焉

虞鄉縣署

署始建於設縣之後雍正九年知縣劉培元奉
文領金於山西布政司營之

自古志都邑者必詳記其宮室苑囿之區官吏

府寺之所以著當時之跡使後得考而指焉三
輔黃圖洛陽宮殿長安市肆記簿諸書至今觀
之尚可想見河中自前代二藩就封并列邸第
多有營構又使者持節臺省按部停驂駐戟館
宇相望至如武衛駢居軍井分畫倍復多在百
年既遠泯滅無存故墟或入於耕犁舊址悉移
於陵谷雖欲訪淮南之阨榭問東平之沈礎而
城郭人民是非更異不獨無能指其處且已莫
知其名而謂向來之有是焉又况高牙幢折雲

烟共飄細柳倉沈沙虫早化至於今日并謝推
尋豈非記載乏好事之人餘跡莫徵於耆舊乎
今所書署舍採舊志之存有可見者續以康熙
至今諸司改易先後更換之次畧備觀覽缺其
不可得詳者云

